

(مجموعة قصصية )

(كومبارس - صفحة الخذلان)

تأليف :

مروة المصري





## دار المنى للطباعة و النشر و التوزيع

مجموعة قصصية : كومبارس تأليف : المؤلفة / مروة المصري حقوق الملكية الفكرية : للمؤلفة مروة المصري حقوق الطباعة و النشر و التوزيع : لدار المنى للطباعة و النشر و التوزيع
رقم الابداع : ٢٦٥٥٤ - ٢٠١٨
الترقيم الدولي : 978.977.6529.78.6
تصميم الغلاف : وجيه ياسر المراجعة و التدقيق اللغوي : مكتب دار المنى للصف و التنسيق و المراجعة العنوان : المقر الاداري : المنصورة . كلية الدراسات الاسلامية . منزل ٣٠ المقر الاداري بالقاهرة : ش متحف المطرية . ميدان النعام . رقم ٤ الدور الرابع الايمل : <a href="mailto:Dar.elmona@gmail.com">Dar.elmona@gmail.com</a> صفحة دار المنى : <a href="https://www.facebook.com/dar.elmona1">/https://www.facebook.com/dar.elmona1</a> رئيس مجلس الادارة : منى عبد اللطيف المدير العام :: أحمد مصطفى ت : ٠٠٢٠١١٤٢١٢٩١٤٠ / ٠٠٢٠١٠٠٦١٠١٠٠٦



اهداء :

الى كل القانعين الراضين بما قد كُتب لهم

ومع ذلك لا يكفون عن الطموح

فدامت السعادة تغمر قلوبكم



مروة المصري

## المقدمة :

ان فن الرواية وطغيانها كشكل أدبي جمالي وسم القرن العشرين، وما زال مرشحا للاستمرار والبقاء لقرون قادمة، صار البحث في طبيعتها الجمالية وانشغالاتها المعرفية والوجودية واحدا من أهم مباحث النظرية النقدية وتاريخ الأفكار وتاريخ الأنواع الأدبية، فالرواية تجسيد لواقعنا و لكن بطريقة أدبية و صياغة ممتعة مع بعض الفانتازيا و الحلول الغير واقعية ، لطرح قضايا سواء عامة أو خاصة ، ونجد رواية كومبارس جاءت لتعبر عن قضية شخصية لبطلة القصة و هي مقاييس الجمال الظاهري و افتقارها لمقوماته ولكنها كانت تمتلك الموهبة و المبادئ ، التي تبددت بفعل أنا العليا لديها ، فطغت عليها و أصبحت لا ترى مميزاتها بل عيوبها و افتقادها للقناعة ، و تدور الأحداث و تتبادل الأدوار بين جنا و ملك ، لقد تفوقت المؤلفة / مروة المصري

على نفسها في سرد الأحداث و الحبكة القصصية و المقدمة و نهاية القصة ، فحافظت على مقومات الرواية ،

و تناولتها بشكل ممتع و مميز و بها الكثير من المترادفات التي توضح المعاني كي تصل للقارىء بسهولة و بأسلوب سلس ، و نتطرق للرواية الأخرى و هي صفحة الخذلان للمؤلفة / مروة المصري

وهي تتطرق مرة أخرى لشخصية مختلفة و هي منة التي تعرضت لحادث أسفر عن اعاقتها ، و تخلي حبيبها عنها و وضوح صورته الحقيقية أمامها لانه شخص أناني انتهازي ، و ترى الوجه الآخر لمدوح الذي يحبها و يمتلك كل مقومات الرجولة و الشهامة و الكرم و من خلال اهتمامه بها تقع في حبه و تستمر المعوقات الذي يكون ممدوح سبب في ازالتها ، لقد تناولت المؤلفة مروة المصري الرواية ببساطة و سلاسة و حبكة درامية رائعة ليتعاطف القارىء مع أبطال القصة و هذا قمة الابداع ، تفوقت المؤلفة على نفسها و أتمنى لها المزيد من التقدم و الابداع

الكاتبة و المؤلفة / منى عبد اللطيف

رئيس تحرير جريدة أخبار العالم

و رئيس مجلس ادارة دار المنى للطباعة و النشر و التوزيع

# كومبارس ( لعنه الكاريزما )

من داخل كافتريا معهد الفنون المسرحية  
تجلس ملك وصاحبها الانتيم جنا ومعهم مجموعه من  
الزملاء بعد ظهور النتيجة و قالت جنا :

- يااا.. أخيرا أتخرجنا كفاره يا رجاله.

- لقد هررنا من أجل هذه اللحظة.. أنا مش مصدقه  
انى نجحت بتقدير امتياز  
والاولى على الدفعة، الشهرة تنادينى.

- يا ملك ..انتِ موهبه، بس المخرجين بيدوروا على  
الشكل قبل أي حاجه.

اصابتني كلمه نهى باليأس والاحباط.. فأنا حقا أدري  
بعيوب نفسى وعيوب جسمي، للأسف جسمي مش ملفوف  
وتخين وشعري مش ناعم، وعندى مشاكل فى البشرة،  
رسمه عيني عاديه ابتسامتي مش جذابه، صوتي مش حلو  
ومش بسلم من تريقت كل اللي حواليا على وزنى  
وسمارى لدرجه أنى مبقتش أطيق أبص لنفسي فى المرايا.  
عكس تمام صحبتي جنا مع أنها كانت أقرب انسانه ليا فى

الدنيا الا أننا كنا عكس بعض في كل شيء هي موهبه  
وفن أقل منى ولكنها كانت جميله جدا و ملامحها جذابه  
ذات بشره بيضاء و عيون خضراء تفتن كل من ينظر اليها ،  
فكانت تتميز بكريزما خاصه تجعل من يعرفها لا ينساها  
ابدا ، لها تأثير وسحرا خاص يجذبك من الوهله الاولى  
وحبها للسيطرة وشخصيتها القوية تجعلها تدخل القلب من  
أول نظره ، كانت تتحب بسرعه فكانت هي دائما محور  
اهتمام الناظرين اليها و دائما تلفت الانظار لها،

وقالت جنا :

- تعالى معايا بكره يا ملك في شركه اعلانات طالبين

موديلز

- موديلز !! انتي بتهزري أنا منفعش.

- ايوه يا جنا .. ملك متنفعش موديلز مش شايفه جسمها

عامل ازاي دى آخرها تبقى كومبارس وصامت كمان.

عادل وهو يضحك :

- ليه يا نهى ما يمكن ربنا يكرمها و تبقى زى شيماء سيف

ولا ويزو.

أضايقت كثيرا و تركت لهم المكان و ذهبت بعيدا بمفردي

جنا :

- أياه اللي أنتو قولتو دا يا جماعه.. كدا كسرتم بخاطرها  
ولعلمكم بقا ملك اكثر واحده موهوبة وفنانة بجد.

ذهبت جنا وراء ملك..

- ملك.. أنتي بتعيطي ليه يا هبله دول متغظين منك عشان

انتى الاولى على الدفعة

- هما كلامهم صح يا جنا أنا مش صغيره عشان

تضحكى عليا بالكلمتين دول.

- أبدا يا حبيبتى حقيقتى أنتى موهوبة وأنا مؤمنه

بموهبتك دي.

- وأيه فايده الموهبة وهى فى جسمى، جسم أقل من

العادي كمان وكل حاجه فيا ملخبطة عمرى ما هكون

فعلا نجمه ولا بطله مستحيل، انا أخرى كمبارس فعلا.

لمحت نظره شفقه فى عيون جنا و أخذتنى فى حضنها وهى تردد

لعل الله يحدث بعد ذلك أمرا.

\*\*\*\*\*

في صباح اليوم التالي رن هاتفي مبكرا فاستيقظت على صوته  
فكانت جنا هي المتصلة

فوضعت الهاتف جانبي وأكملت نومي ولكن هي لن تهدأ حتى  
قلقت منامي واضطرت للرد عليها :

- الوو حرام عليكِ حتى في الاجازة مصحيني من النجمة.  
- بطلى كسل و قومي بقا أنا هعدي عليكى دلوقتى الايكي  
جاهزه

- أقوم أروح فين أنا دلوقتى ، هنروح نبيع لبن.

- لا يا ظريفه هنروح الانترفيو بتاع شركه الاعلانات قومي  
بقا وظيفتى نفسك كدا والبسى أشيك حاجه فى دولابك  
- أنا مش هروح يا جنا أنا كدا كدا مرفوضه ، هروح أكسف  
نفسى يعنى.

- ياساتر على التشاؤم والاحباط على الصبح يابنتى تفائلوا  
بالخير تجدوه ،

- انجزى بقا خمس دقائق وهكون فوق رأسك.

\*\*\*\*\*

ترددت قليلا ولكن كلام جنا شجعنى على الذهاب.

وبعد أن وصلنا الى الشركه أيقنت من الوهله الأولى أننى مرفوضه ولم يتم قبولى رأيت بنات فى غايه الجمال،بنات متحرره بملابسهم الغير محتشمه وبدون حجاب ووجوههم غارقه بمساحيق التجميل فكنت أنا وجنا مختلفين عنهم تماما ولكن كانت جنا تتميز بملامح وجهها الجميله جمالا طبيعيا لا يحتاج الى كل هذه المساحيق وقوامها الممشوق كان يحلى الثوب الذى ترتديه برغم بسطاته، أما أنا فقدت الأمل تماما فليس بوجهى ولا جسدى شىء مميز وجهى ذو البشوره السمراء والملامح العادية وجسدى المليان لا ينفعان ابدا الا كومبارس فى المشاهد الكوميديه فلا يليق بى دور البطولة وان كنت فعلا استحقها.

جنا لاحظت أرتباكى رتبت على كتفى وقالت لا تدرى لعل الله يحدث بعد ذلك أمرا.

جاء دور جنا ، دخلت المكتب لترى رجلا فى العقد الرابع من عمره ولكن مهتم جدا بمظهره وملابسه الفخمه واستايله الشبابى فكان يبدو وسيما أصغر من سنه وكأنه شاب فى العشرين وتقف جمبه فتاه بملابسها الخليعة وتتعامل معاه بمياعه وجرأه شديده وعندما تحدث أيقنت

جنا أن هذا الرجل ليس مصرى هو ثرى خليجي ويبدو أن أعجبه جمال جنا المختلف عن الفتيات التى حوله ويعرفهم ثم قال تيم :

- شو اسمك يا حلوه؟ وعندك كام سنه ؟

- اسمى جنا الحسينى وعندى ٢٢ سنه

- عندك خبره بمجال الاعلان جنا

- فى الحقيقة دى أول مره أشغل أنا لسه مخلصه معهد فنون مسرحيه السنه دى

-جميل ، بس زى ما انتى عارفه شغلانتنا هاد لازم فيهم بعض التنازلات مفهوم.

- تنازلات ازاي مش فاهمه ؟!

- يعنى زى الحجاب مثلا عمرك شفتى ممثله بالحجاب وحتى لو فى أدوارهم قليله ومحدوده، هتقبلى تقلعى الحجاب.

- هو ممكن أقلعه فى التصوير تمام لو الدور عاوز كدا.

تيم بابتسامه خبيثة :

- يعنى موافقه على التنازلات يا جنا؟

- أيوه موافقه.

- تمام أبشرك بالعمل معنا وهتصل بيكى خلال أيام مبروك  
جنا بفرحه وابتسامه تعلقو وجهها : الله يبارك فيك متشكره  
أوى.

\*\*\*\*\*

وخرجت بعد قليل تبتسم لى و تحضننى فقد تم قبولها للعمل في  
هذه الشركة فرحت لها كثيرا ، ثم جاء دوري نظرت لها و أنا  
خائفة قالت لى:

- خليكى واثقه فى نفسك وموهبتك

دخلت مكتب تيم رضوان صاحب الشركة ثرى خليجي وقولت :

- السلام عليكم أنا ملك محمود بقدم على وظيفه موديل

تيم بضحكه مستفزه :

- مين هاد اللى ضحك عليكى وفهمك أنك ممكن تكونى موديل.

- طب حضرتك بلاش تحكم عليا من شكلى وشوف موهبتى

الاول فى التمثيل

- موهبه أيش .. الكلام هاد مو بياكل عيش نحن طالبين مزر

و صبايا حلوين ولا تدرى ما تنباع منتجاتنا

خرجت من مكتبه وأنا مكسورة خاطر وكرهت شكلى

وجسمى أكثر من الاول ذهبت للعمل ببعض المسارح

ولكن لا احد يلتفت لى ودائما يضعونى فى أدوار ثانويه وتنحصر فى الضحك على شكل جسمي فقط مع أن الجميع يشيد بموهبتى و خفه دمی ولكن هذا غير كافي لدور البطولة لابد أن تكون البطلة صارخه الجمال لديها كاريزما خاصة أتعينت بعد ذلك فى وزاره الثقافة وتعرفت هناك على أنس موظف زميل لى وهو أيضا لديه نفس مشكلتي هو طيب وحنون و دمه خفيف ولكن ليس وسيم ولا مفتول العضلات كأبطال السينما وشعره مجعد

وفيوم فجأنى أنس بطلبه للزواج منى ولكن أنا تعجبت قليلا فلماذا أنا وهناك الكثير من الجميلات و قال :

- آنسة ملك فى موضوع كنت عاوز افتحك فيه، أنا كل يوم اعجبي بيكي بيزيد و بصراحه كدا عاوز اتقدملك

رددت بتعجب :

- معجب بيا أنا وعاوز تتقدملي أنا ! متأكد ؟

- أيوه أيه الغريب فى كدا ولا حضرتك مرتبطة

بشخص تاني.

ضحكت بسخريه وقلت:

أنا مرتبطة لا خالص بس اشمعنا انا يعنى اللى عاوز  
ترتبط بيا وايه اللى عجبك فيا ؟

- انتى شخصيه محترمه ومتواضعة وحاسك شبيهي أوى ،  
أنا مش عاوز أتجوز مليكان يا انسه ملك أمشى  
أتعايق بيه قدام الناس ، أنا عاوز واحده بنت حلال  
ترضى بعيشتي و بحياتي وتقف جمبى وأقدر أمنها  
على أسمى وعلى ولادي، لكن الشكل والجمال  
الخارجي دا آخر حاجه ممكن أبص عليها وأنا بختار  
شريكه حياتي، أنا أهم حاجه عندي جمال روحها  
وشخصيتها عاوزها زوجها صالحه ومثقفه لأن هي  
اللى هتقود الأسرة الى حياه آمنه وتؤمن لها مستقبلها  
برجائه عقلها وتفهمها ، هعمل ايه بست جميله من  
بره بس فاضيه و سطحيه من جوه.

وأثناء حديثي معه تذكرت مقوله صينيه تقول : المرأة  
الصالحه ألزم للرجل من يديه وقدميه، أما الأمريكان  
فإنهم يقيسون كل شيء بالمال فيقولون:

- المرأة المرحة تساوي مليون دولار،  
- والمرأة الجميلة تساوي ثلاثة ملايين دولار، أما المرأة  
الصالحه فتساوي ميزانية أمريكا كلها. فهنياً لمن  
قدم الدين والأخلاق.

شعرت أنه يشبهنى فى كل شىء، قربنا من بعض أكثر الى أن تحول ما بيننا الى قصة حب عظيمة تزوجنا بعدها ، حياتنا كانت عاديه وروتنيه جدا ذلك كان يعجب أنس ولكن لايعجبنى أنا ذلك أنا شخصيه طموحه وطموحى لا حدود له دائما أحلم بالشهره والنجاح وتحقيق الذات وكنت دائما فى خلافات مع انس بسبب قلت المال والامكانيات وازداد الأمر سوء بعد أن أنجبت لارا وبعدها مالك ، زادت المصاريف علينا وازدادت حياتى بؤسا و كآبه، اختفى الحب بينى وبين أنس فى هذه الفتره و أصبحت حياتنا كئيبه وممله وفى يوم كنت جالسه أشاهد التلفزيون شاهدت فيلماً للنجمه جنا الحسينى ولكن الفيلم فشل فى السينما ولا يحقق ايرادات و انتقادات كثيرة من النقاد ولكن علاقاتها الكثيره و صداقتها الكبيره جعلتها تستمر وتصبح نجمه برغم كل كلام النقاد عنها وعن عدم وجود موهبه حقيقه لديها انها شكل فقط بلا موهبه جنا و تيم من داخل مكتب تيم قال :

- كنتى هايله يا روحى فى فيلمك الجديد أنا وفيت بوعدى

معاكى أهو فين بقا وعدك معايا

- وعدى؟!.. أنا موعدتكش بحاجه أنت اللى بتوعد نفسك

تيم وهو يحاول يحضن جنا :

- جنا انا بحبك و مش قادر أعيش من غيرك

- سيبنى يا تيم .. قولتك ألف مره لو بتحبنى يبقى

تتجوزنى وتعلن جوازنا كمان

- بس انتى عارفه أنا متزوج وعندى أولاد

جنا وهى تتحرك نحو باب المكتب :

- خلاص يبقى تسبنى فى حالى

\*\*\*\*\*

اختفت جنا يومان من امام تيم وسافرت لتقضى الويك اند  
واغلقت تلفوناتها فكاد تيم ان يثت من اختفائها عنه فقرر  
أن يتزوجها ويوافق على شروطها بعد شهرين من ترتيب  
جنا لحفل زفافها على تيم اتصلت بملك لتعزمها على  
حفل زفافها :

- ألو مين معايا

- مين معاكى آاه يا ندله نسيتى صوتى

ملك وهى تضحك :

جنا حبيبتي و حشاني موت.. انتى اللى ندله والشهره

غيرتك علينا يا نجمه

- يا ختى اتنىلى والله حياه كلها تمثيل وأقنعه وسط كله  
زباله.. بجد أنا مفتقداكى أوى

- وانا كمان نفسى أشوفك واتكلم معاكى.. بس ايه  
سر الاتصال السعيد دا

- فرحى الاسبوع الجاى و مينفعش صاحبه عمري  
متكونش معايا فى يوم زى دا

- ألف مليون مبروك يا حبيبتى أنا فرحتك  
أوى.. وياترى مين دا ابن المحظوظه

- تيم راضون صاحب شركه الاعلانات  
ملك وهى تضحك :

ههههه لا يبقى انتى اللى بنت المحظوظه كدا

- ولا محظوظه ولا حاجه دا جواز مصلحه ومفحوش حب  
هو متجوزنى عشان شكلى وجسمى وانا وافقت عشان خاطر  
فلوسه.

واثناء حديثى فى التلفون دخل أنس الغرفه

- بتكلمى مين ؟

- طيب يا حبيبتى ان شاء الله أنا جايه.. معلى هفضل عشان العيال.

- بقولك بتكلمى مين؟

- فى ايه يا أنس دى جنا الحسينى صحبتى كانت بتعزمنى على فرحها

- الفنانة جنا الحسينى بنفسها بتعزمك على فرحها يا ماشاء الله

- أنت بتستقل بيا ولا ايه وبعدين هى صحبتى من قبل ما تكون فنانة ومشهوره كدا

- لا مش بستقل بيكى ولا حاجه بس أكيد مش هتروحي فرح زى دا بهدومك وحاجتك دى وهتقوليلى بقا عاوزه وعاوزه..

- ايوه طبعا فرح زى دا أنت عارف هيكون معزوم فيه مين؟.. كل نجوم الوطن العربى وخصوصا عشان عريسا تيم راضون

- طب أنا أعملك ايه يبقى متروحيش أحسنلك.

- لا بقا يا أنس هروح.. أتصرف خد سلفه من اى حد دا مش ذنبى أنى اتجوزت راجل فاشل معدوم الطموح زيك.

- أنتى أتجننتى يا ملك أحترمى نفسك.. بدل ما

عرفك الراجل اللى مش عجبك دا هيعمل فيكى ايه

فجأة يسمعون صوت أولادهم يبكون من صوتهم العالي

فتذهب ملك مسرعة الى غرفه اولادها لتحضنهم و

تهدأهم وخرج أنس خارج البيت وبعد أن نامو أولادها

جلست بمفردها تحدث نفسها تبكى يارب أنا مش طماعه ،انا

انسانة عندي طموح وحلم نفسى أحققه القناعة لا تعارض

الطموح ، القناعة هي حدود الممكن للطموح، لو أصغت

الطبيعة الى مواعظنا في القناعة لما جرى فيها نهر الى

بحر ولما تحول شتاء الى ربيع وسر الطموح البحث عن

المفقود مع حمد الله على الموجود.

\* الطموح هو الحل الاخير للتخلص من الفشل -أحمد

الشقيري

الطموح عقار يجعل مدمنيه قابلين للجنون

\* طالما لدى طموح فلدى سبب للحياة. القناعة تعنى الموت ،

رأيت القناعة رأس الغنى

فصرت بأذيالها متمسك.. فلا ذا يرانى على بابيه ولاذا

يرانى به منهمك.. فصرت غنيا بلا درهم أمر على الناس

شبه الملك ، أبارك في الناس أهل الطموح ومن يستلذ

ركوب الخطر وأعلن في الكون أن الظموح لهيب الحياه  
وروح الظفر - أبو القاسم الشابي ..

انا فعليا وحشه و للأسف شايفه نفسى وحشه والموضوع  
مأثر عليا لدرجه أنى بقيت حساسه جدا لاي ملحوظه على  
شكلى ، وكمان ببص فى

الارض طول مانا ماشيه ، أنا عارفه أن محدش لى يد فى  
شكله بس الموضوع خانقنى بشكل كبير نفسى الناس  
تحبنى ، نفسى أسيب بضمه وكل الناس تتكلم عنى بالخير  
أنا معنديش كاريزما أجذب الناس ليا واخليهم يحبونى

دخل أنس أثناء بكاء ملك ، مسح دموعها وحضنها

- متعيطش يا حبيبتي دموعك دى غاليه عندى أوى ..أنا أتصرفت  
و جبتلك فلوس تشتري اللى نفسك فيه.

- لا يا أنس خلاص أنا مش عاوزه حاجه ومش هروح  
الفرح ،مش هحملك فوق طاقتك

- لا بقى دا أنتى هتروحي وعاوزك تبقى أشيك واحده  
فى الفرح كله.

ملك وهى تبتم : تسلم يا حبيبى .. معاك كام ؟

- ألفين جنيه ..

- ملك بعصبيه شديدہ : نعم !! عاوزنى ابقى أشيك  
واحدہ فى الفرخ بألفين جنیه بس دا يادوب أديهم للميكب  
أرتيست.

أنس بصوت مرتفع :

- أنا زهقت منك بجد أحترت أراضيكى أزای وانتى بنى  
أدمه ماديه وطماعه ومفيش حاجه عجاكى.

- هو عشان عاوزه أحسن من مستوايا و مستوى ولادى

وأعيش زى البنى ادمين أبقى ماديه وطماعه يا استاذ ،  
انا متخلقتش عشان ابقى الجاربه بتاعك أنت وولادك  
وتعيشنى بملايم أنا أتخلقت عشان أكون نجمه.

- فوقى بقا من التخاريف والاوهام دى ومتخربيش  
بيتك بأيدك واهتمى شويه ببيتك وولادك يا ست  
النجمه.. فى فرق بين القناعه والرضا والطموح، قناعتى  
ورضاى على قضاء الله والرزق لا يتعارض مع الطموح ابدا  
وامرنا الله بالسعى والا لهلك الناس فى منازلهم.

- ما تقول لنفسك فين سعيك دا ؟؟

- والله أنا فعلا بسعى فى حدود أمكانيتى والفرصه اللى  
جتلى وراضى وسعيد بحياتى وعشان توصلى للراحه  
النفسيه دى حبى واقعك كما هو وارضى بما قدره الله

لك و الاحساس دا لا ينضى فكره الطموح نحو الأفضل..  
النفس تنقاد لما تهوى والقناعه كنز الفرق بينهما انك  
بالقناعه تزداد سعادته وبالنفس تزداد احتياجا النفس راغبة  
أذا رغبتها وأذا ترد ألى قليل تقنع.

- انت كلامك متناقض على فكره أزاى عاوز تكون  
طموح وانت معندكش الحلم والهدف لى دا !!

- مفيش فايده فيكى.. أنا داخل أنام دى عيشه تقصر  
العمر. تانى يوم أتفتت مع أنس بعد العمل يذهب ليأخذ  
الأولاد من الحضانه لاني سأذهب الى خالتي فى محافظه  
أخرى وسأحضر غدا، وافق أنس بعد اقناعه ، خالتي التي  
تعيش في بلده أرياف ولكن لا يرزقها الله بالأولاد كانت  
تعتبرني كأبنتها وخصوصا بعد وفاه والدتي و والدى ولا  
يتبقى لى سواها جلست أنا وخالتي نتحدث

- مش كنتى تجيبى العيال معاكى دول وحشونى  
ونفسى أشوفهم.

- مره تانى بقى يا خالتي انا أصلا نفسييتى تعابنه وجايه  
أغير جو و أرتاح من زنهم شويه وقرف أبوهم

- مالك يا بنتى!! ايه هو انتى زعلانه أنتى وأنس ولا أيه

- لا أبدا بس هو بقى أنسان ممل وبارد والعيشه معاه لا  
تطاق الصراحه

- ايه بس اللى حصلكو دا كل الناس كانت بتحكى و  
تتحاكي عن حبكم لبعض، ولا نسيتى دا الكل كان  
بيحسدك على حبه ليكى.

- الحب لوحده مش كفايه ، فى حاجات تانيه بتظهر  
وبتبقى أقوى من الحب دا وبتموته.

- أزاى الحب كل حاجه ! وهو بيحبك بجد.

- بس الحب من غير حاجه تحييه ويموت بجد..هو  
مبيعملش غير انه بيحبنى وشويه حنيه وطيبه معايا  
مبيعملش حاجه تثبت الحب دا وتقويه.. مبيعملش حاجه  
تانيه تجدد حياتنا وتعيشنا فى مستوى أحسن..زهقت منه  
ومن نفسى ومن حياتى كلها بجد.

ملك تنهار من العياط و خالتها تأخذها فى حضنها

- استهدى بالله كدا يا حبيبتي وكل مشكله وليها حل ان  
شاء الله.

- الأ مشكلتي هى اللى ملهاش حل..عشان بجد المشكله فىا  
أنا.. طول عمرى وأنا شايفه نفسى وحشه ودا مخلينى مش  
عارفه احقق احلامى.

- مين قالك انتى وحشه بس. . كل واحد ليه جمال  
مختلف عن الباقيين مش كلنا حلويين من نفس الجهه،  
كفايه جمال روحك وخفه دمك.

- أنا بقى عاوزه الجمال اللى من برا دا اللى كل الناس  
بتبص عليه.

- ما هو لو أنتى حلوه من بره بس وأنتى كشخصيه  
وحشه محدش هيتبهر بيكى.. أنك تبقى كويسه من جوه  
ده هيخليكى حلوه من بره فى عيون اللى هيستحق التعامل  
معاكى ويستحقك.

- أنتى فاكره صحبتى جنا الحسينى اللى كنت بحكيك  
عنها زمان.

- ايوه ومين دلوقتى ميعرفش جنا الحسينى .. بس هى  
مبتعرفش تمثل ومش مقنعه خالص حتى فلمها  
الاخير فشل واتهجمت النقاد.

- أنا عارفه كل اللى هى وصلتله دا بسب جمالها  
وعلاقتها..

من زمان وهى عندها كاريزما كدا بتجذب كل الناس  
ليها، على فكره فرحها الاسبوع الجاى هتجوز تيم  
رضوان.

- بجد هي عزمتهك ولا ايه ؟

- ايوه عزمتهني بس أنا مش هروح، فرح زي دا عشان

أروحه لازم أعمله جميعه الاول.

- لا يا حبيبتى شوفى اللى انتى عاوزه كله و

متحمليش هم أنتى بنتى يا ملك.

- ربنا يكرمك يا خالتي ، أنا ممكن أستلف منك مبلغ

كدا و هردهولك كل شهر جزء كدا.

- أطلبى يا حبيبتى اللى أنتى عاوزه الخير كتير

الحمد لله.

أتصل أنس بملك و هو غاضب جدا و متعصب عليها فى

التلفون

- ألو.. فى ايه بتكلمنى كدا ليه !؟

- تعالى بسرعه يا هانم أبناك فى المستشفى وقع و

أيده أتكسرت عشان حضرتك سيبلى أطفال وبتستهبلى.

- هو انا يعنى سيباهم فى الشارع ما أنا المفروض

سيباهم مع أبوهم يا أستاذ.

خاله ملك :

- مش وقته الكلام دا يا بنتى.. نضمن على الواد الاول.

سافرت ملك و ذهبت مسرعه الى المستشفى و اخذت  
أولادها فى حضنها وهى تبكى

وبعد أن أتظمنت على ابنها عادوا الى البيت.

أنس :

- ممكن بقا مفيش شغل تانى وتأخدى بالك من بيتك  
وولادك، المره دى ربنا سترها المره الجايه مش  
عارفين ممكن يحصل ايه.

- لا طبعا أنت بتقول ايه أنت عاوز تقضى عليا وتلغى  
طموحى وكيانى، كنت أتجوزلك واحده جاهله ملهاش  
كيان تقعد خدامه بالعيال على ما سى السيد يشرف.

- ولو الشغل دا مخليكي مقصره جامد فى حق عيالك و  
حق بيتك، بصى يا هانم دا منظر بيت دا حرام عليكى  
هتفوقى من أوهامك دى أمتى.. أنا زهقت.

دخل أنس الغرفه لينام و دخلت ملك لتنام مع أولادها فى  
غرفتهم. و ظل الحال بينهم هكذا بدون حوار ولا روح  
كلا منهم لا يحدث الاخر وفى يوم الفرحة بعد أن حضرت  
ملك نفسها ذهبت الى الفندق الذى به حفل الزفاف،  
صعدت الى غرفته جنا الحسيني ، و كان الجميع ملتف  
حول جنا ليحضروها لحفل زفافها وكانت الغرفة مليئة

بكثير من المساعدين و الميكن أب ارتست و مصففي  
الشعركانت تجلس جنا على كرسى و حولها من يصفون  
لها شعرها ويضعون لها المناكير فى قدمها دخلت ملك  
الغرفة وهى مبهورة بكل شىء حول جنا و شعرت أنها  
مرتبه قليلا من جو الغرفة ، ألت السلام على جنا فقامت  
جنا لتسلم عليها و أخذتها فى حضنها بعد غياب سنوات

- حبيبتى وحشانى أوى .. ألف مبروك يا جنا.

- وانتى كمان وحشانى أوى.. ايه أخبارك؟ الدنيا عامله

معاكى أيه؟

- الحمدلله أهو ماشى الحال.

- أقعدى جمبى كدا و أحكىلى..مشتاقه للكلام معاكى

زى زمان فاكره ؟

- ايوه طبعا هو أنا أقدر أنسى.. يارب بس انتى اللى

تكونى فاكره أصلا هو احنا بقينا دلوقتى أد المقام.

- عيب عليكى متقوليش كدا أنتى عارفه معزتك عندى

أزاي، احنا كنا أقرب أتنين لبعض

- اها والله أنتى كنتى أقرب واحده ليا و بحبك جدا..

يمكن عشان بتكلمى الناقص اللى جوايا أو بستمد قوه

شخصيتى منك.

- انتى عارفه يا ملك لو أنا وأنتى بقينا واحد؟! شكلى وعلاقتى مع موهبتك فى التمثيل وخفه دمك هبقى مكس نجمه محصلتش.

قلت لها ضاحكه :

- بس يا خساره بقا الحلو مبيكملش.

عدت الى المنزل وكلمه جنا ترن فى أذنى ..

ماذا لو كانت روحى فى ذلك الجسد..

كنت قرأت هذا الخبر من قبل على موقع الفيس بوك مجموعه علماء فى اليابان اخترعو جهاز بحجم كف اليد وبه سلكان ببديل أشارات المخ بين جسمين مختلفين ، يتم وضع سلك على رأس شخص والسلك الآخر على رأس الشخص الآخر ، كل واحد منهم تتحول روحه لجسد الآخر.. لحد ما يقرروا يرجعوا زى الاول أو لا ، ساعتها أتمنيت أشتري الجهاز دا ولكن كان سعره غالى جدا. بعد كام شهر من جواز جنا الحسينى ، تيم معامله ابتدت تسوء معها واكتشفت أنه على علاقه بأخريات وعندما وجهته بخيانتة لها أهانها و سافر دى وتركها وحدها فى خلال هذه الفتره كان انتج لها ٣ أفلام ولكن فشلو ورأى النقاد فيها أنها شكل بس لكن كتمثيل وموهبه صفر الموضوع دا سبب أكتئاب لجنا و قصر على حالتها النفسيه وكان سبب

مشاكل بينها وبين تيم وخصوصا بعد ما اكتشف أنها  
عندها عيوب تمنعها من الانجاب، أتفقوا على الطلاق بعد ما  
كتب لها فيلا ومبلغ كبير ، جنا أتصلت بملك..

- الو..ازيك يا ملك

- تمام الحمد لله انتى ايه اخر اخبارك يا نجمه

جنا بصوت باكى :

- أنا محتاجه أشوفك ضرورى.

- مالك يا جنا أنتى بتعيطى ليه ؟ فى أيه ؟

- يا ريت تجى البيت عاوزة أتكلم معاكى

تانى يوم ذهبت ملك الى جنا فى فيلتها :

- جنا حبيبتي وحشاني

- أنتى أكثر والله ..

- صحيح الخبر اللى كل السوشيال ميديا بتحكى عنه

دا.. انتى

انفصلتى أنتى وتيم !؟

- أيوه.. اللى بنا أصلا مكنش حب ولا جواز بجد يعنى،

دا جواز مصلحه ، هو أتجوزني عشان جسمي وأنا وافقت

عشان فلوسه.. وأهى المصلحة خلصت خلاص.

جنا بكت بكاء شديد ، أخذتها ملك فى حضنها لتهدئها، و  
قالت ملك :

- متزعليش لما تلاقى حد فرط فيكى.. أكيد راح لحد  
شبهه ويستاهلوا بعض.. وربنا أكيد هيعوضك باللى  
يستاهلك ويحبك حب حقيقى.

- كل اللى بيقربو منى ويعرفونى عشان خاطر  
مصلحه.. مش حاسه أن فى حد بيحبنى لشخصى أنا حد  
يحب جنا من جواها كل باصص على شكلى و نجوميتى  
وبس.

- أزاي يا جنا انتى أى حد يشوفك لازم يحبك.. أنتى  
تتحبى بسره.

- بتحب بسره بس برضو بتساب بنفس السرعة..  
بيحبونى من بره عشان شكلى بس محدش حب روى..  
حقيقى الكريزما دى ليها لعنه، برغم أن أصحاب الكاريزما  
بيتحابو بسره ألا أنهم بيتخلصوا مننا بنفس  
السرعة..الشخص الثابت والمستمر هو اللى بيدخل القلب  
بعد معاناة.

- متزعليش نفسك ، قريب أوى هتقبلي الانسان اللى  
يهحبك ويعشقتك بجد ويعوضك عن كل دا.

- أنا كرهت شكلى و جسمى مبقتش طايقه نظرات  
عيونهم ليا ، مش طايقه نفاقهم ليا عشان أنا النجمه.

- ملك وهى تضحك : لما أنتى كرهتى شكلك يبقى  
أنا أروح أنتحر بقا.

- يا حبيبتى أنتى مش وحشه ، أنتى بس لازم يكون  
عندك ثقه فى نفسك أكثر من كدا.. طب ياريتنى أنا  
كنت الشكل اللى مش عجبك دا بس الاقى الحب والدفى  
اللى بجد وشفتى برغم أن على قدر من الجمال لكن  
مقبلتش فى حياتى حد بيحبنى بجد حب حقيقى، الحب  
الحقيقى أنك تقابلى شخص يخليكى تحبى نفسك وتحبى  
الدنيا وتبقى مبسوطه.. بجد اللى بيحبك مش هيبص  
لشكلك ولا وزنك ولا عيوبك هيحبك وخلص..

- ياا انتى كنتى حبيبتى تيم للدرجه دى .

- حبيته !! هو أنا كنت بلحق أشوفه وأعيش معاه حياه  
زوجيه طبيعه عشان أحبه ، دا يا دوب كنت بشوفه ساعتين  
كل كام يوم وكنت لما أزهدق ولا أشتكى يرمى شويه  
فلوس وهدايا عشان يسكتنى ، عمري ما عيشت معاه اى  
مشاعر جميله زى اللى بتبقى بين أى زوجين ولا حتى  
كان فى بينا تفاهم ولا دفى ولا احتواء..

واللى صدمنى لما عرف أنى مش بخلف اختار أنه يتخلى  
 عنى بكل سهوله كأنى كنت سلعه اشتراها وأستهلكها  
 وقرر فى لحظه انه خلاص مش عاوزها، شفتى حياتى اللى  
 يمكن ناس كتير لو بصت عليها من بره تحسدنى عليها  
 وتفتكر أنى خلاص كدا مفيش حاجه نقصانى وأنا للأسف  
 نقصنى كتير، نقصنى أحس أنى أنسانه بحب وبتحب بجد  
 ،مش نجمه كله مبهور بجمالها وحياتها ادم الكاميرات  
 وبس لكن فى الكواليس أنا وحيدده جدا ميغركيش اللمة  
 الكدابة اللى بتبقى حواليا دى.

ازدادت جنا فى البكاء وهى تقول :

- كان نفسى أبقى أم ، بس أظاهر أكتب عليا انى  
 أفضل طول عمرى وحيدده و ميبقاش ليا حد، كان  
 نفسى أحس انى زوجه ماليه عين جوزها وبيحبها زى  
 ما هى كدا مش بيخونى بعلاقاته المقرفه ولو اتكلم  
 ولا أشتكى أتهن بالشكل دا ويقولى أنا اللى عملتك  
 نجمه و كأنى مليش لزمه فى حياته ولا وجود أصلا.

- يا حبيبتي يا جانا كل دا شايله فى قلبك ،فعلا أنا فى  
 لحظه حسيت أنك كدا وصلتى لكل اللى اى بنت بتحلم  
 بيه شهره وفلوس و متجوزه راجل غنى ولى مركزه  
 الاجتماعى.

قالت جنا بصوت بكاء مرتفع وهى منهارة عصبيا :

- أنا مش عاوزة كل دا، خدى منى الشهره بس ادينى

الحب اللى بجد ، خدى منى الفلوس بس ادينى عيل من عيالک ، خدى منى جوزى الغنى بكل نفوذه و فلوسه بس ادينى راجل يعرف يحتوينى .

حاولت ملك تهدئه جنا فأخذتها فى حضنها

- اهدى بس يا جنا ، خلاص دا مش آخر راجل فى الدنيا عشان تعملى فى نفسك كدا ، أكيد ربنا هيعوضك بالاحسن منه ، دلوقتى عاوزكى تركزى فى شغلك ومستقبلک.

- لا ياملک أنا خلاص هعتزل التمثيل، أنا مش هضحک على نفسى أكثر من كدا .

- شفتى الجهاز اللى اخترعو فى اليابان ، لو اتنين وصلو الاسلاك بدماغ بعض فى الجهاز دا بيحول اشارات المخ وكل واحد بيكون وعيه فى جسم التانى و ممكن يرجعو تانى عادى.

لمعت الفكرة فى دماغ جنا وقررت تشتري الجهاز دا وجبته عندها فى الفيلا ، وفى يوم اتفقنا على أننا نبدل وتذهب روح ملك الاستديو للتصوير وروح جنا كانت فى

جسم ملك رجعت بيتها جلسنا على الجهاز وفى خلال  
ثوانى حسيت أنى فقدت الوعى و بعد دقائق فوقت مش  
مصدقه النتيجة خرجت ملك بشكل وجسم الفنانه  
المشهوره جنا الحسينى ، بصت لنفسى فى المرايا كنت  
فرحانه أوى، لأول مره أحب شكلى ، جسمى بقى مضبوط ،  
شعرى بقا أصفر و ناعم جدا عينى بقا جذابه وملونه بقيت  
النجمه جنا الحسينى انبهرت بكونى نجمه مشهوره

والجميع يلتف حولى لارضائى، لأول مره فى حياتى أمشى  
بكل ثقته، بصيت على جنا حسيتها عاوزه تعيط بعد ما  
دخلت فى جسمى التخين دا ، وجنا ذهبت الى بيت ملك فى  
الأول كانت مرتبكه قليلا، لأنها ذاهبه لتعيش فى حياه  
جديده عليها و أشخاص ليست متعوده عليهم و مسئوليه  
من نوع اخر، جنا كانت تعلم أنها لن تنجب أبدا فذلك  
دفاعها نحو أطفال ملك بحب وحنيه لتشعر باحساس  
الامومه ولولا دقيقه فى عمرها.. نظرت جنا الى البيت  
شعرت انه غير مرتب قامت بترتيب البيت و أعدت أصناف  
جديده من الطعام جلست لتلعب مع لارا ومالك ، عاد أنس  
الى بيت وجد البيت رائحته جميله و مرتب وملك تجلس  
مع أطفالها يضحكون، اندهش من ذلك وشعر بشيء  
غريب..

- السلام عليكم .. حبايب قلبى وحشتونى

قبل أطفاله وقبل ملك ايضا، ولكن ملك كان تشعر بالخجل منه.

- فى ايه يا ملك أنا حاسس أن فى حاجه غريبه.

- حاجه غريبه أزاى يعنى.. مفيش حاجه أهو.

- طيب يا حبيبتي أنا شامم ريحه الأكل تجنن ياترى الشيف بتاعى هيكلنى ايه؟

- ثانيه والاكل يكون جاهز.

- أساعدك فى حاجه يا حبيبتي.

- لا انا خلصت كل حاجه هرص بس الاطباق على السفره.

- طب يلا نرصهم سوا.

ساعدها أنس فى اعداد الاطباق وجلسو على السفره لياكلو الطعام.. أنس كان ديما حريص على ان يأكل ملك والاولاد

جزء من الطعام بيده قبل ان يأكل هو.. مد أنس يده  
ووضع الطعام فى فم جنا ولكنها كانت تشعر بالخجل  
والارتباك فأمسك يداها وقبلها وهو يقول:

- تسلم ايدك يا حبيبتى الاكل جميل أوى.

شعرت جنا بالحب والألفه لأول مره واستشعرت قول الله  
تعالى وجعل بينكم موده ورحمه ، لأول مره كانت جنا  
تشعر بمعنى السعاده الزوجيه الحقيقه فهى لن تشعر بها  
مع تيم فى فيلتها الواسعه وأثاتها الباهظ الثمن ، وشعرت

بها حقا فى ذلك المنزل الصغير البسيط. فالسعاده ليس  
لها وقت محدد ولا معنى محدد ولكل منا فلسفته الخاصه  
عنها، فكلا منا يراها فى الشئ الذى ينقصه ، فالفقير  
يراهها بالمال، والمريض يراها بالصحه، والسجين يراها  
بالحرية وأولئك يرونها بالحب.. وتبقى معانى السعاده  
غير محدودة أبدا!! دائما نبحث عن ما ينقصنا ولا نعلم  
بأن لدينا ما هو أجمل بكثير، فلدينا أشياء كثيرة هى  
بمثابه أحلام لغيرنا ، فالسعاده ليست حكرا على سن معين  
أو مال أو مركز، السعاده قد تجدها فى أبسط الأشياء ولن  
يعرف السعاده الا من أراد أن يكون سعيدا ولن يهديها أحد  
لك الا اذا رغبت فيها ولا تبحث عنها لأنها قد تكون قريبه  
منك ولكنك لا تراها ، لذلك لا تنتظر من أحدهم أن

يوقع ورقه سعادتك، لا تنتظر من أحدهم بأن يمنحك  
 تلك السعاده ، بل أبحث عن سعادتك بنفسك ولا تحرم  
 نفسك فى العيش مع كل لحظه من لحظاتها وأياك أن  
 تعتقد أن السعاده فقط فى الأشياء باهظه الثمن التى  
 نمتلكها بل هى تسكن فى أبسط الأشياء من حولنا..

- أنس .. أنا لازم أنزل بعد الغدا أشتري شويه طلبات

- طب خليكى انتى فى البيت مع الولاد و أنزل انا

أشترىهم

- لا معلىش لازم أنزل أنا..

- خلاص يا حبيبتي بس متأخريش عشان أنا كمان

عندى مشوار مهم.. أنا كلمت واحد صحبى مخرج و خدت

دور ثانوى فى مسرحيه وقبضت كمان العربون أهو، خدى

خلى معاكى عشان لو نفسك فى حاجه.

- لا شكرا مش عاوزه حاجه.

- انتى لسه زعلانه منى.. يا ملك أنا بحبك و مقدرش على

زعلك ، انتى كل حاجه ليا فى الدنيا ومليش غيرك.

- لا خالص مش زعلانه ولا حاجه بس خليه معاك دلوقتى لحد

ما أرجع.

كانت ملك أنتهت من التصوير و المخرج وكل المتواجدين شكرو في أدائها التمثيلي الذى تحسن كثيرا، ذهبت الى الفيلا و انتظرت حتى عادت جنا و أوصلو أسلاك الجهاز و عاد كل شىء لطبيعته كانه لن يحدث واستمر الحال شهور جنا بتروح الصبح تشتغل موظفه و بعدين ترجع البيت تقعد مع أولاد ملك و تطبخ لزوجها وفي ذلك الوقت أذهب الى الاستديو لأنهى أورد التصوير وأحقق حلم التمثيل والشهره ونتقابل آخر اليوم كل واحد يرجع لطبيعته تانى فى الوقت اللى كنت ببص فيه لنفسى جوه جسم جنا كنت بحبنى فعلا، حبيت ضحكى واللمعه فى عينى، حبيت أنى وقت ما أطلب حاجه تجيلى، وأن كل طلباتى أوامر، حبيت صوت التسقيف بعد كل مشهد بأديه، من مخرجين عمرى ما كنت أحلم أتصور معاهم.. وبصراحه جنا كانت بتصعب عليا فى الوقت دا ، أنا أكثر واحده مقدره معاناه انها تعيش فى جسمى مع شخص زى جوزى كل همه انى أفضل قاعده جمبه من غير طموح ، وأطفال مابيبطلوش عياط.

وفى الفتره دى جنا الحسينى بقت النجمه رقم واحد فى مصر، عملت ثلاث أفلام ومسلسلين.. صحيح النجوميه دى نصها موهبتى، بس مين مهتم بملك مين هيسيب أميره الحفله ويبص لواحد ماحصلتش حتى تكون وصيفه؟! فى

الفترة دي كان تيم رجع القاهرة و بيحاول يطاردنى فى  
اي مكان أذهب الى وقت التصوير و كان بيحاول يكلمنى  
لكن كنت برفض أقابله و بتهرب منه بأى طريقه وفعلا  
عرفت جنا بأن تيم بيطاردنى و بيحاول أنه يتكلم معايا  
وهى نفسها استغربت جدا وقررت أن هى تجى معايا فعلا  
الاستديو وقت التصوير ولكن بصورة ملك وهتشوف فعلا  
هو عاوز منها ايه بعد اللي حصلها بسبه، أول ما وصلنا  
كان هو هناك حاول يكلمنى أنا على أساس أنى جنا ولكن  
دخلت الغرفة الخاصة بيا وقفلت الباب وجنا هى اللي  
فضلت واقفه

- أنت عاوز منها ايه تانى مش خلاص طلقته واتخلت  
عنها.

- وأنتى بصفتك ايه تتدخلى ما بينا ولا هى عينتك  
المحامى بتاعها.

- أحب أقولك أنك مستفز جدا على فكره ، انت ازاي  
اصلا مسامح نفسك عشان يبقى عندك الثقة الجامدة دي  
انها ممكن يكون في أمل انها تسامحك!!

- أنا بحبها وندمت على اللي عملته معاها وحسيت  
بغلطتى ، بس أراضيهأزاي..

- انت ازای شايف ان مشاعر الناس لعبه كدا !! ارجووك  
 انت ابعد عنها طول ما انت بتحاول تقربلها انت بتأذيها جدا  
 نفسيا لانك مش متخيل كم الالم النفسى اللى سببت هولها  
 .. منك لله انت وكل الناس اللى مبتقدرش مشاعر غيرها  
 ... لو لسه فيك ذره ندم ياريت تبعد عنها ... علاقتكوا دى  
 انت اللى كتبت بايدك نهايتها فمتستناش منها اى تنازل  
 ،هو أنت وأمثالك تدمروا الواحد نفسيا و فالآخر تسألوا  
 ارضيها ازای.

- قوليلها أنى مستعد أعوضها عن كل اللى راح و نبداً  
 صفحه جديده، فلوسى و أموالكى كلها هتبقى تحت رجليها.

- و ده مبدأ الناس اللي عيونها فارغة زى حضرتك ، و  
 تمسكك ده بس عشان هى رفضاك ما هو اللى تملكه الايد  
 تكرهه العين ، و لو قبلت و اتجوزتك انت هاترجع أسوا.  
 الطبع غلاب، هو دا حال البشر .. بيرمي وبيهمل الشئ  
 اللي ضامنه وفى ايده عشان يكسب البعيد و اللي يهون  
 عليك مرة هايهون تانى الف مرة ربنا يعوضها بعيد  
 عنك.. نصيحتى لىك ابعد عنها اللى عملته فيها اكبر  
 بكتير من كلمه وجع وكسره وحزن اللى جواها  
 مستحيل الفلوس والذهب والأسف ممكن يمحيه ، اللى  
 جواها لا انت ولا غيرك يقدر يطيبه..

أنهت جنا حديثها و دخلت الغرفة سريعا و أغلقت الباب  
وأنهارت من البكاء و حاولت ملك تهدئتها وفهم سبب  
بكاءها

- فى ايه يا جنا هو الحيوان دا قالك ايه ولا ضيقك فى  
ايه تانى!؟

- لا انا اللى قولت كل اللى جوايا و أرتاحت خلاص  
فاكرنى لعبه وعاوز يشترينى تانى بفلوسه.

- لا الشخص ده لو اتقلب لبلياتشو قدامك أوعى ترجعي  
لان الشخص ده مش لى الامان اطلاقاً هو صعب عليه انه  
شايفك مش مقهوره بالعكس شاف نجاحك اكبر من  
الأول والاصعب انك رافضه ترجعي.. إيذاء القلوب ليس  
بهين..

وبعد فتره الموضوع اتطور معايا وبقى عندى شغف أفضل  
فى جسم جنا أطول وقت ممكن ، كنت بأعد الدقايق وأنا  
ملك عشان أرجع تانى أعيش جنا الوضع كان شبه طبيعى  
لحد ما جنا سافرت بره مصر تبع مهرجان سينمائي ساعتها  
ما قدرتش أعيش فى كابوس ملك.. سافرت يومان عند  
خالتي فى البلد..

- خالتي أنا عاوزة أقولك سر كتماه في قلبي بقالي  
شهور، ونفسي أفضض وأعرف اللي بعملو دا صح ولا  
غلط..

- قولي يا حبيبتى خير؟!!

- تعرفى أنا و جنا صحبتى اشترينا جهاز من اليابان  
بيبدل اشارات المخ وبقالى فتره بروح بدالها التصوير  
وهي بتتعد بدالى فى البيت.

- مش معقول يا ملك أنا مش مصدقه اللي أنتى بتقولى  
دا، ازاي يا بنتى تعملى فى نفسك كدا طب ازاي  
مفكرتيش فى بيتك وولادك و بتسبيهم كدا!

- أنا أنسانه عندي طموح وأحلام عاوزة أحققها هفضل  
قاعده جمبهم كدا لحد أمتى محلک سر

- دا مش طموح ، فى شعره رفيعه بتفصل بين الطموح  
وعدم الرضا، فين دا الانجاز اللي حقيقته لنفسك من دا  
كله، جنا هي النجمه الحقيقه وانتى زى ما انتى ملك  
الموظفه ، اللي محدش عارفها ولا بيديها اي اهتمام.. انتى  
كدا بضيعى حياتك هدر ،

حبي نفسك زى ما انتى و شوفى مميزاتك ايه وركزى  
عليا و عيوبك حاولى تعالجها.

- أنا كلى عيوب مفيش أى مميزات.. معنديش رضا بشكلى.

- بصى يا حبيبتى ربنا قسم الرزق دا بالتساوى، يعنى جميع النعم عند البشر جميعا متساويه ، بس ربنا أخذ من دى الجمال و أعطاها الصحه والذريه الصالحه، وأعطى التانيه جمال بس حرمها من حاجات تانيه ممكن تكونى أنتى مش شايفه و ممكن مثلا هتعرض لأبتلاءات تانيه فى المستقبل، يعنى لو واحده فاقده البصر وقالوا لها أنتى أجمل أهل الأرض هل هي فرق معاها وهى مش شايفه نفسها أصلا؟! لا تنظري الى نصف الكوب الفارغ وانظري لغيرك كل أنسان عنده ابتلاءات.. انتى بس اللى فاقده الثقه فى نفسك وفى حاجه أسمها الرسائل السلبيه اللى بتعطيها للمخ ، لو انتى شايفه نفسك جميله هتبقى جميله والناس هتشوفك زى ما أنتى شايفه نفسك ( كن جميلا ترى الوجود جميلا ) العيب مش فى خلق الله، العيب فى نظرتك أنتى لنفسك.. الكثير منا يعتقد أن السعاده تكمن فى أكتمال لوحته بمعنى أن يمتلك شيئا ينقصه فيظل هاجسه أنه لن يعرف السعاده ألا به وبذلك أصبحت السعاده عنده مشروطه، مع أننا لو بحثنا داخلنا لوجدنا السعاده فى كل مالدينا رغم عدم كماله، فالسعاده ليس لها كيل أو ميزان.. السعاده هى أن تجد داخلك المنفذ نحو

بصيص النور الذى سيضىء حتما حياتك ، بكل بساطه يكفى  
 أنى لازلت أستيقظ صباحا لأرى شمس يوم جديد لأعلم أن  
 السعاده الحقه لازالت موجوده بين ثنايا هذا النور.. لو  
 بحثنا داخلنا جيدا ونظرنا حولنا سنجد السعاده بانتظارنا،  
 بانتظار أن نطلق لها العنان دون أى شروط أو قيود.

قالت ملك بنبره حزينه:

- طب نعمل ايه بقا فى الناس اللى مبتبصش غير على  
 الشكل والمظاهر، الموضوع دا مآثر عليا جدا..

- مش كل الناس سطحين وبشوفو الشكل الأول..  
 الشكل كدا كدا بيروح مع الزمن ، الروح هى اللى  
 بتفضل، هى اللى بتعيش وهى اللى بتحبها الناس، عمري ما  
 شفت شخص سوى بيحب حد عشان شكله حلو، بالعكس  
 عشان روحه حلوة وتصرفاته معتدلة وطبعه لين ، اتمنى  
 تكتشفى دا جواكى الروح والتصرفات والطباع الجميلة  
 وتتعلمى حاجات تزيد ثقتك فى نفسك.. هو فعلا فى  
 ناس بتتحب بمجرد رؤيتهم ، لكن فى ناس برضو بتتحب  
 بسبب أخلاقهم.. وبعدين حتى لو الحلاوه بالشكل هتروح  
 لاننا كلنا هنعجز وهنكرمش لكن اللى هيفضل الشخصية،  
 وربنا جميل بيخلق كل حاجه جميله ، المفروض نقول

الحمد لله انه خلقنا فى أحسن شكل الحمد لله لا أتولدنا بعيب  
خلقى ولا مرض يهد الروح والجسم..

- الحمد لله على كل حال.

- صدقيني الجاذبية فى الاخلاق.. متنسش انك  
جميلة..

أخبرى نفسك كل يوم بأنك جميلة ، بأنك قوية ، وان  
رب الجمال ما خلق قلبك ليحزن ..

\*\*\*\*\*

سافرت الى بيتى وكنت أفكر فى كلام خالى وأحاول أن  
أقتنع به ولكن كنت أحب نفسى كنجمة مشهوره اكثر ..  
جلست وحدى وانا لا أطيق حياه ملك الروتينه الممله  
التى لا أشعر به فى بتحقيق ذاتى دخل أنس الى الغرفه  
وهو غاضب و صوته مرتفع

- فى ايه يا ملك أنتى بقالك أسبوع على الحال دا  
ورجعتى تهملى فى بيتك وعيالك تانى، انتى ايه غيرك  
تانى بعد ما كنتى مثال للزوجه والام المثاليه..

- أم و زوجه، أم و زوجه وانا فىن من دا كله.. أنت  
عاوز حقوقك منى أنت وأولادك ، طب وأنا فىن حقوقى  
على نفسى هى مش نفسى دى ليها عليا حق ، ولا أنا

الشمعه اللى هتتحرق عشانكم و فى الاخر أختفى وميبقاش  
ليا وجود.. أنا عاوزه أعمل لى نفسى كيان ووجود ، لازم

أبقى شمعه أه بس مش عشان أتحرق عشانك وبس ، لا  
عشان أنور حياتى أولا و أكيد حياتكم هتنور معايا..

- أنتى أنانيه ومبتفكريش غير فى نفسك و متنفعيش  
أصلا تكونى أم ، ولا مقدره قيمه النعمه اللى غيرك بيتمنى  
ظافرها.

- أنانيه!.. أنت اللى قتلت طموحى و خلتنى مطفيه، بحاول  
أرفعك لى فوق وأنت ديما بتشدنى للارض.

قال أنس بغضب وعصبيه :

- أنتى هتفضلى كدا ساخظه و كارها عيشتك حتى لو  
الدنيا بحالها بقت تحت رجلىكى قال رسول الله " من  
أصبح منكم أمنا فى سربه معافى فى بدنه يملك قوت  
يومه فكأنما حيزت له الدنيا بحذافيرها " بأعتقادى  
الشخصى السعاده تكمن فى القناعه فهناك الكثير من  
الناس لديهم كل شىء ولكن يشعرون بأنهم لا يملكون  
أى شىء وذلك دليل على عدم شعورهم بالقناعه  
والرضا ( أقتنع بما كتب الله لك تكن أسعد وأغنى  
الناس ).

\*\*\*\*\*

جنا رجعت من السفر مصدقتش انها وحشتنى كصاحبتي  
الأنتيم، أظن فهمت أن وجودى جواها هو اللى وحشنى..  
بقيت بتلكك عشان أفضل وقت أطول فى جسمها لكن  
الغريب بقا أنى محستش أن الموضوع دا مضايقتها ولا  
حاجه، وبقيت مستغربه ازاي هى قادره تستحمل حياه ملك  
كدا؟! لا دا أنا كمان حاسه بحاجه غريبه ، كنت برجع

ألقى أنس و الأولاد مبسوطين والحياه مستقره أكثر ما  
بكون أنا شخصيا موجوده، حسيت أن ملك وهى جواها  
نورت وأحلوت أكثر.. و كنت أعود الى بيتى أشعر بشيء  
غريب ، علاقاتى بآنس والاولاد تحسنت كثيرا ولكن أحيانا  
أثناء حديثى مع أنس يتهمنى بأنفصام الشخصيه

- أنتى بقيتى انسانه غريبه كل شويه بحاله، شويه تبقى  
كويسه و حنينه ومهتمه بينا وشويه ألابيكي عصبيه و مش  
مستحمله حتى ولادك!! أنا ساعات بشوفك قاعده تلعبى معاهم  
زى الطفله فى وسطهم وبتبقى حنينه عليهم وساعات أشوفك  
بتزوقيهم بعيد عنك و مش عاوزهم يتنفسو حتى..

- وأنت دورك فىن كآب ، أنا تعبانه طول النهار فى الشغل  
ومش طايقه حد جمبى.

- لا انتى ست مريضه و عاوزه تتعالجى أنتى بتتحولى  
 كدا أزاى حتى معايا أنا كنت حسيت بحبك واهتمامك و  
 تشجيعك ليا و دلوقتي مش طايقنى؟! ومن النهارده  
 هتقعدى فى البيت ومفيش شغل خدى بالك من عيالك  
 بقا والقرار دا نهائى

- لا مش من حقتك تأخذ قرار يخصنى بالشكل دا.. دى  
 حياتى ومن حقى أعيشها زى ما أحب احنا كبنات فى مصر  
 مختلفناش كثير عن زمن الجوارى بس الفرق ان الاسلوب  
 هو هو بس تحت مسمى اشيك شويه ، البنت فى البلد دي  
 عامله زى البقره الي مسحوبه بحبل فى بدايه حياتها امها  
 وابوها واخوها الكبير هما الي ماسكين الحبل من الاخر  
 ومن اول ما بتتولد وهما بيئها فيها عشان لما تكبر يسلمو  
 الحبل لجوزها حتى الشهاده الي بتاخذها بتاخذها عشان  
 تتجوز بيها جوازه عدله وطبعاً الي ماسك الحبل من  
 النص الناس وكلامهم .. !

- انتى أتغيرتى أوى، أنا بقيت بحس انتى واحده تانيه  
 غير اللى حبيتها زمان وكل حاجه حبيتها فيكى أختفت ليه  
 خدتى منى حبيبتى اللى حبيتها !!

وبعد مرور شهرين كنت أحاول تجنب النقاش مع أنس أثناء وجودى فى البيت فى فتره الليل ، ولكن جنا هى من كانت تتعامل معاهم طوال اليوم باعتبارها أنا المفأجاه أن أنس حقق شهره فى مجال الفن فى أدواره الثانويه بدأ يلمع كنجم صاعد وأصبح له جمهوره و معجبيه ، أستغربت قليل لم يكن ذلك انس الذى عرفته يوما ما أصبح لديه هدف و طموح يسعى له و يحققه و ينجح بالفعل فى تحقيقه.. عاد أنس الى البيت وجد البيت مظلم ولا يسمع صوت ملك ولا الأولاد شعر بأرتباك قليلا

وفجأه ظهرت ملك وهى تحمل تورته مضأه بالشموع على يدها وتغنى أغانى عيد الميلاذ و الأولاد خلفها يسقفون ويضحكون، فرح أنس ولكنه أستغرب كثيرا لما حدث..

- كل سنه وانت طيب يا حبيبي وعقبال مليون سنه

- وانتى طيبه يا حبيبتى دى أجمل مفأجاه حصلتلى

النهارده

- لا ولسه.. أنت لسه شوفت حاجه غمض عينك وتعالى

أمشى معايا يلا بقا فتح عينك وقولى أيه رأيك ؟

- جميله أوى أنا فعلا كنت محتاج بدله عشان أحضر بيها  
مهرجان القاهره السينمائي، بس شكلها غاليه أوى وكمان  
الساعه دى شكلها غاليه.

- أيوه ما أنا عارفه أنك هتحضر المهرجان قولت لازم  
أشوف حبيبي أشيك واحد وبعدين مفيش حاجه تغلى  
عليك يا حبيبي.

- أهو الكلمتين دول بقا عندي أحلى وأجمل من مليون  
هديه ربنا يخليكى ليا يا حبيبتى.

- أنا هروح بقا أحضرك الغدا على متغير هدومك.

دخل أنس المطبخ ورا ملك..

- أنتى مين ؟!

- نعم .. أيه السؤال الغريب دا ، أنا ملك مراتك.

- ياريت !!

- ياريت أيه ماهى دى الحقيقه فعلا.

وضعت ملك يداها على جبين أنس وهى تضحك :

- أنت سخن ولا ايه ؟

مسك أنس يداها بحنيه وهو ينظر فى عينها

- لا مش دى الحقيقه أرجوكى متستغفلىنىش أكثر من  
كدا انتى مش ملك ، أنا حسيت بحاجه غريبه من أول  
يوم دخلتى فى البيت دا والنهارده بس أنا أتأكدت من  
شكوكى دى بقالى خمس سنين متجوز مفيش مره اتعملى  
عيد ميلاد ولا مفاجاه حلوه زى دى ولا كلمه حبيبى اللى  
بطلت أسمعها منك من سنين ومبقتش بسمع منك غير  
الكلام عن الفلوس والماديات و عشيتنا اللى مش عجاكى  
ونقدك ليا.

- وهو دا بس اللى خلك تشك انى مش ملك ؟

- لا يا... أنتى أسمك أيه؟ عرفينى أنتى مين، أنا مشتاق  
أنى أعرفك.

- جراك أيه يا أنس ،أنا ملك .

- لا أنا عارف أول حرف من أسمك G ، السلسله اللى  
ساعات بشوفك لابسها وغالباً ربطت السلسله دى بالروح  
الحلوه اللى احتلت حياتى فجأه .. ولما مش بشوف فى  
رقبتك السلسله دى بترجعى تانى ملك اللى أعرفها.

تركته جنا وذهبت الى الغرفه الاخرى فهى أحبته و لا  
تستطيع أن تكذب وهى تنظر فى عيناه جرى أنس خلفها

وأمسكها من ذراعيها وأقترب منها أكثر ونظر في عيناها  
وقال :

- أرجوكى عرفينى أنتى مين ؟

- أيوه أنا مش ملك.. انا جنا الحسينى وقبل  
ماتستغرب و تقول أيه حاجه عاوزه أقولك أن فى الاول  
وافقت عشان حسيت ان ملك هتوصلنى للنجاح اللى بتمنه  
لكن أكتشفت أنها وصلتنى للحياه اللى كنت مفتقدها، فى  
الاول خدتها على انها لعبه بس انا دلوقتى حبيت اللعبه  
وعاوزه أكمل فيها.

قال أنس بغضب وحزن :

- لعبه!.. بس أنا و ولادى مش لعبه فى أيديكم تغيروا  
و تبدلو زى ما أنتو عاوزين ،أبعدو عننا انتم الاتنين.

- لا مش قصدى خالص يا أنس أنك لعبه، أنا قصدى  
أقولك أنى حبيتك..أنا خلاص لاقيت نفسى وحبيتها وأنا  
معاك أنت الشخص الوحيد اللى عرفت تحتوينى وتحسسنى  
بالأمان والحب اللى كنت مفتقده.

- غريبه.. بقا النجمه جنا الحسينى هى اللى بتقولى أنا  
الكلام دا، النجمه اللى كل الناس بتتمنى راضها وحبها.

- أنت بنفسك جاوبت أهو ، كل الناس بتتمنى راضها  
 عشان هي النجمه الحلوه وهم معجبين بجمالها ونجوميتها  
 وبس انما أنت حبيت الروح اللى جوايا خليتنى أحب نفسى  
 و شكلى حتى لو مش حلوه، كفايه انى بحس معاك وفى  
 عنيك أنى أحلى ست على الكوكب كله ، كفايه الامان  
 اللى حسيتها لما سبت نفسى فى حضنك.

- يعنى عاوزه تفهمينى أنك كنتى متجوزه واحد من  
 أغنى أغنياء الوطن العربى كله ومحستيش بالامان دا معاه  
 بفلوسه و نفوذه و جايه تحسى مع واحد غلبان وفقير  
 زيي!

- لا هو اللى كان فقير برغم كل فلوسه دى بس كان  
 فقير فى المشاعر والاحساس، الغنى فى المشاعر دا  
 محستش بيه غير وانا وياك.. الفقر مش بس فقر الفلوس  
 والماده لان دا ممكن يتعوض وسهل نحصل عليه او نتعايش  
 معاه لكن الفقر اللى بجد اللى يقهر الروح هو فقر  
 الاحساس و المشاعر هو دا اللى صعب تعوضه كنوز الدنيا  
 بحالها.. أول يوم دخلت فى القصر بتاع تيم كنت مبهوره  
 بكل حاجه فيه بكل تحفه موجوده فى القصر ويوم بعد يوم

بقيت أتأكد وأحس أنى زى زى أى تحفه موجوده فعلا فيه كان بيعاملنى على انى جسم فقط بس من غير روح،

حتى حزنه كان كله شهوه من غير أحساس، كنت بكره نفسى وانا معاه وكنت حاسه انه ممكن يسبنى فعلا فى اى لحظه، لان علاقتنا كانت هشه جدا وفى أول موقف حصل بينا أتخلى عنى وسبنى.. عشان كذا بقولك محستش بالامان دا غير وانا وياك حسيت انى ملكت الدنيا بين أيديا حسيت أنك عاوز تحافظ عليا وبتخاف عليا، حسيت معاك بالحب الطاهر اللى يقف ضد كل الصعاب اللى فى الدنيا ويكمل للاحر وينجح، أنا كنت محتاجه حد مخفض من الدنيا فى وجوده ويتقبلنى بكل عيوبى ومميزاتى ومزاجيتى اللى بتتغير مليون مرة فى الساعة، يمسك إيدى قبل ما أقع وأتسند عليه لما الدنيا كلها تبقي ضدى،

عايزة شخص يعرف امتى يبقي "حبيبى وصاحبى واخويا وابويا". يملئ الفراغات اللى فى حياتى يعوضنى عن كل ليالى البؤس والحزن اللى عشتها، حد يحسننى فعلا ان وجودى فى الحياة مهم وإن الحياة مبتكلمش الا بوجودى.. انا عايزة أتحنن "طبطة وإهتمام وحب وثقة وسند وأمان" ..فهمت ؟..

- بس أنا معرفكيش.. كل اللي بتتكلمى عنه دا كنت بعيشه وبحس بيه مع ملك مراتى وأم عيالى مش معاكى انتى!

- لا يا أنس أنت بنفسك أعترفت أن ملك أسلوبها معاك كان أتغير ورجعت حبيتها تانى لما أنا اللي دخلت حياتك مش هي ، وهي مكنتش حاسه بكل اللي أنت بتعملو عشانها ولا فارق معاه بدليل أنها اختارت الشهرة و سابتك..أنا بحبك صدقنى حاسه انى بحبك بكل ذره فى قلبى ، حاسه انى نفسى أرتمى فى حضنك الدافئ الحنين زى العيله الصغيره اللي وحشاه حضن أبوها.

- أنا مش هنكر أنى حبيتك و كنت ديما لما بشوفك لابسه السلسلة بتمنى أنك أنتى اللي تفضلى معايا على طول ،

بقيتى أنتى الوحيدده اللي بتفهمنى وانتى اللي شجعتنى ووقفنى جمبى لحد ما وصلت للى انا فيه دلوقتى و لما كنت بكون مضايق كنتى اول حد بجرى عليه وأحكيك اللي جوايا مكنتش بحس أنى أرتحت غير لما احكيك كل اللي جوايا ولما كنت بروح مكان حلو كنت بتمنى تكونى

أنتى اللى معايا فيه.. أنتى مش هى لان حلاوة الدنيا مش بتكمل غير بوجود اللى بنحبهم ، هى مكنتش بتفهمنى ولا بتشجعنى ولا عرفت تحتوينى زى انتى محتوتينى و دخلتى جوايا ، يوم عن يوم كنتى بتتسر سبى جوا روحى لحد ما سكنتى جوايا.. بس ملك

- ملك خلاص لاقى نفسها فى الطريق اللى هى أخترتة، لكن أنا وأنت لاقينا بعض ،هى غبيه أختارت الفلوس والحلاوه

متعرفش أن الفلوس بتروح وبتتصرف والحلاوه بتروح بشويه تجاعيد واللى بيفضل بس هو القلب اللى بيعشق الوحش اللى فينا قبل الحلو..

- بس أنتى بسهولة كدا هتتخلى عن نجوميتك ونجاحك وهترضى تلغى كيانك وطموحك بس عشان حسيتى بالدفأ والود اللى كنتى مفتقداهم.

- مين قال أنى كدا بلغى كيانى و طموحى، ، أنا كيانى و طموحى بقا جزء من كيانك وطموحك انت والأولاد لما أنت حققت نجاح فى الفتره الأخيره فى شغلك حسيت أن أنا اللى نجحت معاك و لما بكون مع الأولاد بحس أنى لازم نربيهم أحسن تربيته عشان نطلعهم أشخاص مفيده

لمجتمعهم و نجاحهم و طموحهم هيكون ليا جزء كبير  
فيه وأظن أن دى أسمى وظيفه فى الدنيا اللى فطرنا عليها  
ربنا.. ودا مش هيمنعنى برضو من انى أقرأ وأتعلم وأطور  
من نفسى وأمارس هواياتى اللى بحبها.

كل حاجه كانت ماشيه بشكل روتينى لحد يوم العرض  
الخاص للفيلم الجديد واستغربت لما لاقيت جنا هى اللى  
بتطلب منى أن أحضر العرض الخاص بدالها، وطبعاً فرصه  
زى دى مكش ينفع تتفوت، معجبين وكاميرات ونجوم  
مجتمع فى كل مكان..

بدلنا أجسامنا، ولسه هخرج أروح مكان العرض سمعت  
صوت تكسير فى أوضه الجهاز جريت لقيت جنا كسرت  
الجهاز وقطعت كل الأسلاك.. صحيح أنا فيه جزء جوايا  
أتمنى أن دا يحصل ، بس خوفت لما حصل بره ارادتى.

جنا ضحكت بصوتى اللى عمرى ما حبيته وقالت:

- فى الوقت اللى كنتى مبهوره فيه أنك جنا الحسينى،  
أنا كنت بستمع بنعمه كونى ملك، ملك اللى كانت  
عائشه فى حب ودفى وسط عايلتها اللى بيحبو من قلبهم  
بجد زى ماهى كدا، ملك اللى مش مضطره تعمل دايت أو  
تكون جميله طول الوقت، ملك اللى مش لازم تضحك  
على أى حاجه من أى حد عشان ميتقالش عليها مغرورة..

أنتى كنتى بتأخدى اللحظات الحلوة من حياه جنا بس ،  
لكن مجربتيش تنامى فى بيت كبير لوحدك على ذكريات  
جوزك اللى رمى لك قرشين لما عرف أنك مبتخلفيش  
زى مراته الأولى، أنا كنت بنام وأنا عارفه أن هصحى وأنا  
مضطرة أتعامل مع ألف واحد طمعان فيا، حياتى مكنتش  
حلوه زى ما انتى شوفتيها وقت التصوير على الناحيه  
التانيه حياتك مستقرة وجميلة ، الخوف فيها من حاجات  
سهله ومشاكل ليها حل.. لو تلاحظى أنى حسينت  
علاقتك مع جوزك وولادك ، هما بس محتاجين شويه  
صبر وتفاهم.. انتى اللى مكنتيش مقدره قيمه النعمه اللى  
كانت فى أديك وكنتى ديما بتبصى على نص الكوبيه  
الفاضى كنتى عميه مش شايفه النص المليان بوجود  
ولادك اللى ناس كثير محرومه من نعمه الانجاب زى  
كدا يتمنى يخسروا كل فلوسهم و حياتهم قصاد وجود  
طفل واحد بس يفرحهم ويشيل اسمهم حسيت معاهم

بأحلى احساس تتمنى الست مهما وصلت لأكبر المناصب  
أنها تحسه احساس الأمومه الغريزه اللى اتخلقنا عشانها  
كنتى عميه مش شايفه جوزك اللى كان بيحبك بجد زى  
ما أنتى كدا ومش عاوز التغير دا منك هو بجد راجل من  
الرجال اللى تسببى ليهم روحك وقلبك وانتى واثقه أنه

مش هيصبهم خدش كان طيب وبيفهمك ومكذبش عليكى  
تحت مسمى الحب زى ما حصل معايا، قلبه صافى و نقى

زى السما بعد المطر وكان ديما بيحاول يفرحنى حسيت  
معاه أنى أحلى ست فى الكوكب. الحياه مش ديما  
هتعطيكى كل حاجه بتحبها.. لكن القناعه هتخليكى تحبى  
كل شىء عندك و كأنك تملكى الدنيا بحالها. السعاده  
فى القناعه.. لكن الرغبه بالمزيد من طبيعه البشر  
الأصليه..يقول الله ( وأنه لحب الخير لشديد ) الانسان  
الراضى بقدره لا يعرف الخراب، كنت أتمنى لو أننى  
أدركت مبكرا المعنى الحقيقى للسعاده هى حاله ذهنيه لا  
ترتبط بالمال أو المنصب أو الشهره ، السعاده اختيارا  
يمكن الحصول عليها بجهد أقل وتكلفة أبسط ،ولكننا نبقى  
متمسكين بالأفكار التقليديه حول تحقيقها. وديما صدقيني  
العش الصغير أدفاً من العش الكبير.. عشان كده قررت  
أعمل صفقة تانية زى الأولى بس المره دى ملكيش فيها  
حق الاختيار ، أنا اخترت أكمل حياتى كملك ، حتى لو

عكس ارادتك، ولو حاولتى تثبتى عكس كلامى أو تحكى  
لأى شخص محدش هيصدق لأن الجهاز ممنوع فى مصر  
وهيفتكروكى اتجننتى. مش هقدر أنسى ضحككتها وهى  
بترجع شعرى الخشن لورا، وبتقول لى : " يلا يا نجمه  
جمهورك مستنيكى.. هتتأخرى عليهم".

# صفحة الخذلان



من داخل غرفه مظلمه، استيقظت من  
نومي، كنت متعبه وكأني نائم منذ أعوام!  
نظرت الى غرفتي وجدتها تعمها الفوضى من كل  
جانب وعلى يساري عقاقير طبيه كثيرة، أمسكت  
بهاتفى لأحدثك أخبرك عن كل تلك الفوضى وهنا  
دوى فى مسامعى أنك رحلت! وهنا أيقنت أن كل  
هذه الفوضى ، فوضى رحيلك يا باسم..  
ليتك تعلم كم عانيت بغيابك.. فأنا كاليتيمه  
بدونك لم أعد أرى من حولى ، فمنذ ما يقرب من  
نصف عام وأنا لا أراك، آخر مقابله كانت بيننا فى  
ليله الحادثه المشئومه عندما أخبرك الدكتور بأن  
الحادثه سببت لى أعاقه فى قدمى أصابتنى بالعرج  
وتحتاج الى علاج طبيعى طويلا و ممكن ايضا هذه  
الحادثه تسبب لى مشاكل فى الحمل بعد ذلك  
تخلت عنى و تركتنى لا أرى وجهك من يومها ولا  
حتى لمجرد الاطمئنان عليا وفجأه استوقفت نغمه  
هاتفى خواطرى وأذا بدقات قلبى تتسارع و تكاد أن  
تخلع قلبى من قفصه الصدرى من حجم شدتها  
وقوتها

أنه هو ..... يا ليته هو

فضل قلبي يتراقص مده العشرون ثانيه حتى أمسكت بهاتفي و قرأت اسم الطالب خذلتني مره أخرى ولكن هذه المرة لن تكن متعمدا فقد كان الطالب ( ممدوح ) ليس الا مجرد صديق بالنسبة لي فهو مهندس ديكور في الشركة التي نعمل بها ولكن أيقن أنني أعنى له أكثر من مجرد صديقة ترددت قليلا في الرد على هاتفي و شعور الخيبة والخذلان يملأن صدري وقلبي الحزين الذى بدأ في الهدوء والتوقف عن النبض ولكنني رددت عليه كي لا اشعره بنفس أحساس خيبتني فلا يعرف قيمه الوجد من الشيء أكثر من الذى ذق مراره الشعور به نعم كنت أتمنى أن تحدثني أنت يا باسم فقد اشتقت لك لدرجه مجرد أن أتذكرك أختنق... أختنق شوقا لك فليس كل من يختنق يحتاج أكسجين فأنا أختنق وأحتاج إليك

- أهلا يا ممدوح أزيك ؟
- أنا كويس .. المهم أنتى طمنيلى عليكى.
- أنا بخير الحمد لله أتحسنت كثير
- الحمد لله كنت قلقان عليكى اووى.. وحببت أظمن عليكى.
- أنا راجعه الشغل بكره على فكره أجازتى خلصت

- أيوه ما أنا عارف .. دا الشركه هتنور والله بقالها فتره مضلمه كدا و كئيبه.
- شكرا يا ممدوح ربنا يخليك .. مع السلامة.
- شكلى ضيقتك باتصالى.
- لا ابدا بس أنا تعبانه وعاوزه أنا.. تصبح على خير.

وأغلقت هاتفي، أنى رددت عليه ردا باردا ويمألن الشعور بالخذلان و خيبه الامل فحين نصاب بالخذلان سنعرف معنى التبلد - البرود - انعدام الثقة والنوم طويلا ولكن ممدوح لا يستحق منى كل ذلك ممدوح حبنى بصدق حبنى بكل ما اوتى من حب تماما مثل ما أحببت باسم ولكن ليتنا نختار من نحب فذلك الشعور بالحب نابع بقرار من القلب لا تدخل للعقل فاتخاذ هذا القرار اطلاقا والا يعد حب فيسمى اعجاب فالحب يدخل القلب ولا يستأذن كسهم طار ولم يرتد .استيقظت صباح ذلك اليوم وأنا أرددها كالعادة أنا سعيدة.... أنا سعيدة حتى ولو لم أجد ذلك السعد سأوهم عقلي بالسعادة لربما تصبح واقعا اليوم هو أول رجوع لمكتبي في الشركة التي اعمل بها بعد غياب شهور اشتقت لمكتبي ولعملي و تصاميمي و لوحاتي نزلت من البيت وركبت سيارتي وانا في طريقي الى الشركة

وكلما اقتربت أكثر تتسارع دقات قلبي أكثر وأكثر  
كناقوس الخطر لا أدري ماذا سيحدث ولكنى على يقين  
تام انني اذا رأيتة امامي سأحترق...فأنا حقا خائفة أن  
أرى وجه أمامي لعله اذا رأيتة أخذته بين يدي لأخبره  
بأنني نسيت وقوفه امامي ينسيني هروبه عنى.. فوجدت  
نفسى امام الشركة نزلت من سيارتي وأنا أستند الى عكاز  
و أعرج قليلا فرأيت ممدوح واقفا مع تقى ، تقى هي  
صديقتي المفضلة أو بمعنى أصح صديقتي الوحيدة فأنا لا  
افرح بكثرة الاصدقاء المزيضة حولي فمن أهم مبادئ الكيف  
أفضل بكثير من الكم فالعبرة ليست بعدد الصدقات ولكن  
بمن هو أصدق ف تقى كانت الاقرب لقبلي دائما ارتاح  
للحديث معها كنت أشعر أنها من دمت على العلم ان  
شخصيتها ليست مثل شخصيتي تماما فنحن مختلفتان  
ولكن الاختلاف في معظم العلاقات لا يعد مشكله فأحيانا  
نختلف لنكمل بعضنا. فتقدمت نحوهم و نظرات ممدوح  
تلاحقني نظرات مليئة بالهفة فأحيانا تكون للعيون لغة  
أخرى أفصح من لغة اللسان فالنظرات مشاعر لا تتحدث  
ألقيت عليهم السلام و مددت يدي لأصافح تقى ومددت يدي  
أيضا لممدوح أحتضن يدي بقوه كطفل يخطو خطوه  
الاولى أمسك بيدي امه خشيتا من الوقوع وأبتسم لي  
وقال:

- اشتقت لك اوى يا منه .

سحبت يدي بقوة...

- وأنا كمان اشتقت لكم كلكم ..

وبالذات ل توتو حبيبتى وحشتنى قعده الفطار والنميمة بتاعت  
الصبح .

و سحبت تقى من يدها وقلت لها:

- يلا تعالى نفطر سوا كدا و نشحن بفضجان قهوه عشان  
نعرف نشغل بمزاج .

وتحركنا خطوه للأمام واذا بممدوح يستوقفنا ويقول

- هو انا مش واقف معكم من الذوق يعنى تستأذنوا منى  
أو تعزموني على الفطار معكم .

\_ أسفه مقصدتش اتفضل معانا طبعا .

- اوك .. يلا نحضر الفطار سوا.

فاستوقفنا جميعا صوت يأتى من الخلف ، صوتا مألوفاً  
بالنسبة لى أنه أكثر صوت مألوفاً الى قلبى ، نعم أنه  
صوت باسم فالتفتنا جميعا الى مصدر الصوت ، التفت بكل

لهفه كادت أن تقفز من عيناى ولكن حاولت أن اتصنع  
البرود وعدم الاهتمام لا أريد أن تفضحني ملامحي و  
نظراتي ويقولو ما لا يستطع النطق به لساني وقال باسم :

- ازيكم عاملين ايه.. ازيك يا منه نورتي الشركة

ممدوح و تقى في صوت واحد :

- الحمد لله

وأنا ترددت لحظه في الرد عليه كنت أود أن أقول له :

- تريد أن تعرف كيف حالي انني أموت... ليست بخير

اطلاقا من دونك ولكنى رددت بداخلي كوني قويه يا

منة لا تظهرى له ضعفك بدونه وابتسمت ابتسامه

مصطنعة وقلت بكل برود

- أنا في أحسن حال الحمد لله زى الفل .

- يا رب ديما . تقى ، فين التصميمات الجديدة اللي قولتلك

تجهزها امبارح.. أنا عاوزهم على مكتبي دلوقتي.

- حاضر يا باسم هنفطر بس عشر دقائق وهيكونوا عندك

مشينا وقلبي ينزف ألما

وأتساءل مع نفسي كيف وصلنا أنا وباسم لهذه الدرجة !  
 أين حبنا ؟ أين شوقنا وقت اللقاء ولهفه الحديث معا ؟  
 اتساءل في حيره كيف جاء لك قلب تتركني هنا وحدي  
 أين أحلامنا معا ؟ أحيانا يكون شعور الخيانة أهون علينا  
 من شعور الخذلان فالخذلان يجعلك تشعر بالخيبة والندم  
 وتتساءل ما الذي حدث في حيره ودهشه وأنت لا تجد  
 اجابة على سؤالك أنه حقا شعور مؤلم حين نعود غرباء  
 مع من كانوا يعنون لنا الحياه وبعد أن تناولنا الفطار  
 ذهب ممدوح الى مكتبه وجلست أنا وتقى نتحدث قليلا  
 وقالت لي في وسط الحديث :

- ممدوح بيحبك أوي يا منه

- عارفه باين عليه و عنيه فضحاه أوي.. لكن

أنا مش حاسة بحاجه ناحيته

- أنتي لسه بتحبي باسم ؟

- أيوه يا تقى بحبه جدا ومش عارفه أنساه.. وده

أكثر شيء تعبني بجد.

- فوقى يا منه باسم مش بيحبك.. شليي من دماغك

بقا.

- اللي بيحب بجد مبيعرفش يكره أبدا يا تقى.. مش قادره أنساه بجد. و انهيت الحديث و ذهبت الى مكتبي وبعد أن انهيت شغلي وعدت الى منزلي ، اتصلت بمكتب تنظيم المعارض لا وكد عليهم موعد تنظيم
- معرضي الأول في شقه العائلة كنت على أتفاق مع أمي واخواتي على ذلك قبل الحادثة و ها انا الان تحسنت وانتهيت من جميع لوحاتي وهى الان جاهزة للعرض سوف أذهب لتحضير كل شيء غدا وأتفق مع مكتب تنظيم المعارض لعمل الدعاية اللازمة أتمنى نجاح هذا المعرض فانا انسانه طموحه وحلمي الأكبر أن أصبح فنانة مشهوره وأظهر فنى للنور وبعد أن اتصلت بمكتب تنظيم المعارض خرجت من غرفتي لأتحدث مع أمي و أخواتي :
- ماما أنا عاوزة مفاتيح الشقة عشان هروح بكره أجهز للمعرض.
- معرض ايه اللي بتتكلمي عنه.
- معرضي أحنا مش اتكلمنا في الموضوع دا قبل كدا.
- المعرض دا ها يفشل بلا تضيع للوقت و هبل بقا أنا اتفقت مع واحد هياجر الشقة وهو جاى يستلمها بكره .

- احنا مش كنا متفقين و بعدين ازاي تحكم عليا بالفشل  
 بالطريقة دي.. مش عشان أنت فشلت في حياتك عاوزني  
 انا كمان أفضل زيك.

فأخذ مفاتيح الشقة من أمي بالقوة و ذهب شعرت بالغضب الشديد  
 و خيبه الامل

- انتو بجد كدا بتحطموني.. بتحطموا أحلامي و طموحي  
 ليه .

أمي لا تستطيع أن تقول شيئاً مع العلم هذه ليس شقته  
 وحده انها ملكنا جميعا ليس من حقه التحكم فيها هكذا  
 فذهبت غاضبه أحضرت هدومي و شنطتي لأذهب الى بيت  
 جدى سأجلس هناك بمفردي لا أريد احد فقد سأمتكم و  
 سأعتزلكم جميعا أمي حاولت أن تمنعني عن الذهاب رغما  
 عنى و اختي كانت جالسه لم تقول شيء كانت متفرجة  
 صامته ليس لها دور ولكن لا ألوم عليها فقد تعلمنا السلبية  
 من هذه العائلة أكثر من الايجابية علمونا كيف نصبح  
 سلبيين في المواجهة سلبيين في حياتنا وقرارتنا علمونا  
 دون قصد علمونا بأفعالهم ليست باقولهم فهذا هو الخذلان  
 الاكبر عندما تخذل من الأقربون من الذين من دمك  
 عندما تخذل من الذى تغنيت دائما أمام الجميع أنهم هم

سندك و ضهرك عندما تخذل من الذين لن تتوقع منهم  
الخدلان أبدا عندما تخذل من الذين أذا الظروف وضعتك  
مكانهم لن تفعل معهم مثل ما فعلو معك وتظل تردد هل  
انا من هونت عليهم؟!!

وتتخيل نفسك في الموقف المضاد هل ستفعل مثلهم!

فاذا كانت الاجابة... لا..

فصفعه الخذلان ستكون مؤلمه للغاية التي لا تدرك الا بالشعور  
بالخيبة والالام وصلت الى منزل جدى وألقيت بحقيبتى وأمسكت  
بهاتفى لأحدث تقى فأنا بحاجة اليها بحاجة للحديث مع أحد  
أرتاح له ويفهمني

- تقى أنتى فىن محتاجه أتكلمك معاكى.

- اتكلمى مالك يا منه.

- لا عاوزة أشوفك مباحبش أتكلم فى الموبيل كدا.

- طيب يا بنتى أنا دلوقتى فى مشوار مهم لما أخلص

هكلمك.

- سلام

قفلت معها وأنا حزينة، فتحت دليل هاتفى مره أخرى  
لألقي نظره على الأسماء التي بداخله لعلى أجد اسم من  
هذه الاسماء أحدثه الان فأنا أريد الحديث مع أحد أريد

أحد يستمع لي و أنا أخرج ما في قلبي ظللت أقلب في دليل هاتفي واكتشفت أنه فارغ نعم فارغ ليس فارغا من الأسماء ! ولكن فارغا من الأصدقاء والاحباب فكلهم الان أصبحوا لي مجرد أسماء فقط ، لا يعنون لي شيئا فقد خذلت منكم جميعا بلا استثناء ، وبقيت وحدي ، كما لو انني لن أكن برفقه أحدهم من قبل في تلك اللحظة رن هاتفي ولكن هذه المرة أصاب توقعي انه ممدوح نعم عندما

سمعت نغمه هاتفي هو أول من جاء في خاطري، يمكن لأن لأحد غيره أصبح يهتم لأمرى

رددت عليه ولأول مره عندي الرغبة بالحديث الطويل معه أريد أن يسمعني وأسمعه :

- ألو.. أزيك يا ممدوح
- الحمد لله عامله ايه
- الحمد لله ماشي الحال
- متأكدة صوتك بيقول عكس كدا..حاسس أن في حاجه .

شعرت في تلك اللحظة ولأول مرة بشعور جميل نحوه فهو الوحيد الذي اهتم لأمرى هو الوحيد الذي يشعر بالذي في داخلي وهو لن يراني تأكدت من صدق مشاعره نحوى لأن عندما نحب حقا سنشعر بحزن من نحب حتى

وأن لم نراهم فحزن الحبيب معدى والقلوب إذا أحبت  
بصدق تشعر بمن تحب جيدا

- أنا فعلا مش بخير يا ممدوح.
- مالك يا منه احكيلى..ايه رايك نتقابل فى الكافيه اللي  
روحنا قبل كدا .
- ياريت والله أنا فعلا عاوزة اخرج عشان مخنوقة.
- طب يلا عشر دقائق و هكون هناك.

ذهبت الى الكافيه ورأيت ممدوح جالسا فى انتظاري ألقيت عليه  
السلام

وجلست بجانبه

- فى ايه منه مالك ؟ قلقتيني عليكي!
  - أنا حاسة أن الكل أتخلى عنى يا ممدوح فقد خذلني الجميع.
- قاطعني وقال...

- ألا أنا يا منه عمري ما هخذلك ابدا ولا أتخلى عنك.
- شكرا يا ممدوح على كلامك الجميل دا انت أنسان نبيل.
- أنا بحبك يا منه.

قالها فجأة ولكنها كانت متوقعة كنت أراها فى عيناه من  
فتره فلا أتفاجأ من هذه الكلمة ولكنى لن أستطيع الرد  
عليه، فأنا للأسف لازلت أحب باسم من كل قلبي ، حتى

بعد تخليه عنى و هروبه منى ولكن ليس بيدي شيء لن  
أختار أن أحبه فقلبي هو من أختار هو من ينبض بحبه  
ولن يتوقف عن حبه الى أن يتوقف عن النبض

- أنا أسف لو كنت أتعديت حدودي معاكي.. بس دا  
فعلا شعوري نحيتك. وكنت بأعبر لك عن اللي أنا  
حاسس بيه بجد.

- يا ممدوح أنا مضيقه اوى ..في مشكله مع أهلي و  
سيبت البيت ورحت بيت جدى.

- ليه كدا حصل ايه ؟؟.

- كنت بحضر لمعرض في شقتنا الفاضية .. لكن منعوني و  
محدث وقف جمبي ولا شجعني.

- متزعليش يا منه أنا هقف جمبك وأساعدك... انا واثق فى  
نجاحك ان شاء الله

- بس انا مش عارفه اعمل ايه ولا اتصرف أزاى.

- متشليش هم حاجه أنا هكلم سمسار يشوفلنا شقه كويسه  
تنفع للمعرض.

- أنا خايضة جدا يا ممدوح

- تفاءلي خير يا منه ومش عاوزك تخافي طول ما انا  
جمبك... يلا بقا نطلب العشا انا جعان.

وبعد أن تناولنا العشاء أوصلني الى منزل جدى و ظل واقفا حتى شاورت له من شرفه المنزل و ظللت واقفه في الشرفة و أنا أتأمل القمر واذا بي اراه وحيدا قلت في نفسى اذا كان القمر وحيدا في منتصف الليل و يضىء الكون بنوره في عتمه الليل مع أنه وحيد الا أن يعجب الناس بنوره هكذا أنا وحيدة كالقمر خذلت في نصف مشواري لماذا أبقى حزينه وحيدة لا أرى الحياه الا بأشخاص بعينهم لكن مهلن أرات أن أجاب على نفسى في

هذه الجملة أبقى حزينه لانهم كانوا سبب فرحى أبقى وحيدة لأنهم كانوا هم من يملؤون على حياتي وها هم خذلوني وجعلوني وحيدة في تلك الليلة وعدت ذاتي بأنني أصلح من نفسى بأن حياتي لا تقف على أحد فياليت نفسى توفى بعهدا كانت كلمات ممدوح داخل أذني أنى واثق في نجاحك يا منه تفاءلي خيرا يا منه ، فكانت كلماته حافزا قويا لي على النجاح ، لابد أن أنجح وأحقق ذاتي لابد أن أثبت للجميع من أنا ويعلمون حقا قيمتي لن أبكى على أحد بعد اليوم سأجعلهم هم من يبكون ويندمون فنحن لا نجد السعادة حقا الا حين نربط حياتنا بأهداف وليس بأشخاص وأشياء وضعت ذلك امام عيني وأقسمت على النجاح.

استيقظت في صباح ذلك اليوم بكل همه ونشاط نظرت في المرايا شعرت أن نور وجهي منطفئ فابتسمت ابتسامه عريضة وقويه كي أشعر بها على وجهي فأنا لا أشعر بها داخلي ، ذهبت الى العمل وقابلت الجميع بابتسامتي الكل لاحظ تغيراتي فأنا كنت لا أبتسم لاحد رأيت تقى وكانت تتوقع منى ان أعاتبها على موقفها معي البارحة ولكن لن أعاتب أحد بعد اليوم.

تقى : منه.. ازيك والله أسفه كنت مشغولة جدا امبارح.

\_ ولا يهملك أنا بخير

قلتها وأنا أضحك بصوت مرتفع

كي أخفى ما بداخلي.

تقى : يا رب ديما

رن هاتفها استأذنت منى و ذهبت تتحدث بعيدا عنى انني أشعر أنها تخفى عنى شيئا ما فقد تغيرت معي كثيرا لن تعد تهتم لأمرى وأصبحت تخفى عنى أشياء كثيرا. جاء ممدوح وتقدم نحوى:

- أزيك يا منه.
- الحمد لله بخير
- أنا كلمت السمسار وفي كذا شقه مناسبه. ايه رايك
- نروح نتفرج عليهم بعد الشغل
- تمام موافقه عدى عليا ف المكتب وننزل سوا.

رأيت على وجه ممدوح ابتسامه نابعه من قلبه ولمعه في عينيه لن أراها من قبل. ذهبنا وشاهدنا الشقق و اختارنا شقه مناسبه ، أعجبت جدا بشخصيته فقد كان أنسان متفهم وذكى و مقنع وينظر للأشياء بأبعاد اخرى كانت تغيب عن بالى عكس باسم تماما كان شخصا متسلطا يريد تنفيذ رأيه حتى أن كان على خطأ شعرت بشعور الاعجاب

نحوه لأول مره حضرنا معا كل شيء بخصوص المعرض لم يتركني فقد كان سندی الحقيقي ، بدأت أشعر بمشاعر تجاهه ولكن كلما رأيت باسم صدفه في الشركة يفيق في قلبي شعور الحب نحوه ولكن يوم بعد يوما تعلقت بممدوح كثيرا ، ابتعدت عن الجميع حتى تقى ، لم أعد أحدثها باستمرار كعادتي وهى أيضا لن تهتم لذلك ، وكنت في أغلب الاحيان أراها تتحدث مع باسم منفردا في مكتبه ولكنى لن أشغل بالى كثيرا بحكم أننا زملاء في

العمل ليس اكثر دخل عليا ممدوح مكتبي وهو مبتسما ،  
وحاملا لشيئاً وراء ظهره:

- غمضى عنيكى

- ليه ..وايه اللى انت ماسكه ورا ضهرك دا.

- قولتلك غمضى عنيكى بس

غمضت عيني..

- فتحى أجمل عيون شوفتها فى حياتى.

فتحت وأنا أشعر بالخجل من كلامه وبالفرح أيضا

- ايه دا دعوات المعرض. .شكرا يا ممدوح تعبتك جدا معايا.

- ايه الكلام اللى يزعل دا..لا يا حبيبتي تعبك راحه انا بكون

مبسوط وانا معاكى وممكن اعمل اى حاجه فى الدنيا

علشانك.

شعرت بقلبي يدق نحوه للمرة الاولى

دقات قلبي كانت مرتفعة وسريعة ، كدت أن أسمعها بأذنى.

- مش عارفه بجد اشكرك ازاي..انت عملت معايا اللى

معملوش أقرب الناس ليا

- عشان بحبك يا منه..انتى ليه مش عاوزه تفهمينى ولا تحسى بيا.

- أنا كمان بعزك جدا يا ممدوح بس كأخ و صديق هو دا كل احساسى نحييتك بصراحه. وبعدين بقا أنا متوتره جدا وخايفه.

- مش عاوزك تخافى طول ما انا جمبك وأن شاء الله المعرض هيكسر الدنيا وهتنجحى.

- طب يلا نوزع الدعوات دى.

- خليكى أنتى فى مكتبك وأنا هوزعهم.

دخل ممدوح مكتب باسم

- باسم أفضّل دى دعوه لمعرض منه الاسبوع الجاى ياريت تشرفنا.

باسم يرد بكل استخفاف وهو يلقي بالدعوه على مكتبه.

- معرض ايه !! انت اليومين دول مش مركز فى شغلك وشغلك كله غلطات يا ريت نركز بدل الهبل دا.

- انا شايف شغلى كويس ومش انت اللى هتقولى أعمل ايه ومعملش ايه.

- انت نسيت نفسك ولا ايه يا ممدوح أنا هنا رئيسك.

وفجأة ارتفع صوتهم لدرجه تدخل بعد الزملاء وذهبت تقى و

منه أيضا

قام بعض الزملاء بتهدئة الامر وأمسكت بيدي ممدوح وقلت له:

- فى ايه يا ممدوح ايه اللى حصل.
- لا والله هنسيب شغلنا بقا و نقعد نحكى أيه اللى حصل..كل واحد على مكتبه أيه التهريج اللى بيحصل دا.

عاد الجميع للعمل و دخلت مع ممدوح مكتبه

- فى ايه يا ممدوح صوتكم كان عالى ليه!؟
- مفيش يا منه دا انسان مغرور وقليل الذوق هو عشان خاله هو صاحب الشركة هيشوف نفسه علينا.
- معلىش أهدى هو فعلا مغرور شويه.
- لا دى مش شويه بعقل دا مغرور بغباء.
- خلاص أنا راجعه مكتبى عشان فى شغل كتير لازم أخلصه

ممدوح: طيب هنروح سوا النهاردة.

- ليه و فىن عربيتك!؟
- عند الميكانيكى بتتصلح..وبعدين مش عاوزه تردىلى جزء من جمايلى اللى مغرقى.
- بقا كدا...طيب أنا مبوصلش حد أتشعبطلك بقا فى أيه اتوبيس يروحك

- خلاص يابنتى يخربيت اللى يهزر معاكى.

وأثناء ضحكنا دخل باسم..

- لا بجد أنتو زودتوها أوى..دى مبقتش شركه محترمه

- حاسب على كلامك يا باسم فى ايه ؟

- فى ايه؟ مش شايفين شغلکم وواقفين تهزروا

ومستغرب كمان فى ايه!

- خلاص يا باسم مفيش داعى لكلامك دا..أنا كنت بستفسر

من ممدوح على حاجه بخصوص الشغل

- عشان كنت بقالى فتره مش موجوده.

عدت الى مكتبي وأنا أتساءل هل كلام باسم ، من باب الغيرة عليا

وأنه مازال يحبني أم من باب الغيره على العمل فقط.

جاء يوم المعرض وأنا خائفه ومتوتره جدا لكن وجود ممدوح

بجانبي يطمئن قلبى قليلا ، ذهبت الى المعرض وأنا متألقة وبكل

أناقتى

كأنى ذاهبه الى يوم عرسى فوجدت ممدوح قد سبقنى الى هناك.

- ممدوح أنا خايفه أوووي

يمسك يدي بقوه..

- قولتلك متخفيش طول ما أنا جمبك.

فات من الوقت ساعتين ولن يأتى أحد توترت أكثر و شعرت  
بالخيبه ولكن ممدوح يظل يطمئنى

- شكل مفيش حد جاى يا ممدوح أنا شكلى فشلت زى ما الكل  
قالى.

- أنتى مفشلتيش يا منه أنتى بس عشان لسه مبتدأه ومش  
معروفه محدش جه يمكن هو دا السبب.

- طب حتى أهلى و زميلانا مش أحنا بعتنا لهم دعوات طب  
مجوش ليه أنا بجد زعلانه منهم أوي.

- هو أنا مش كفايه معاكى يا منه ولا أيه.

- لا يا ممدوح متقولش كدا..أنا تقريبا حاسه أنى مليش حد  
غيرك دلوقتى.

ممدوح بفرحه بشديده :

- الله..أخيرا بدأتى تحسى بيا.

- يلا نروح يا ممدوح محدش هيجى كدا خلاص.

عدت الى منزلى وأنا محطمه وكارهه للحياه

أتصلت بممدوح صباح اليوم التالي

- ممدوح أنا تعبانة النهاردة ومش هقدر أجي الشغل ياريت  
تعملى أجازة النهارده.
- سلامتك يا منه..أجبلك دكتور وأجيلك.
- لا مفيش لزوم أنا بس مرهقه شويه ومش هقدر أجي.
- ألف سلامه عليكى..هبقى أعدى عليكى النهارده أشوفك لو  
محتاجه حاجه.
- أوك.. مع السلامه.

رن جرس الباب فتحت أنه ممدوح.

- ازيك يا منه..عامله أيه دلوقتى.
- أتفضل أدخل طيب هنتكلم على الباب..وأيه اللى انت جايبو  
معاك دا؟
- دا أكل..أكيد لسه مكلتيش قولت نتغدى سوا.
- أيوه والله أنا فعلا جعانه جدا..ياترى جبتلنا أكل ايه بقا !؟
- جبتلك البيتزا اللى بتحبيها.
- الله..وأنت عرفت منين بقا أنى بحبها أوى كدا.
- لما كان مهندس طارق عازمنا وانتى طلبتيها مخصوص  
عرفت انك بتحبيها أوى.

- وأنت كنت سايب كل حاجه ومركز معايا أوى كدا.
  - طب لو مركزتش فيكى انتى بس هرکز في ايه.
- أيقنت حينها أن ممدوح يهيم بى عشقا فهو يحبني حبا مختلف !!
- فالاهتمام بالتفاصيل الصغيره ؛ أشد أنواع الحب صدقا
- ف فقط من يهتم بك يجعلك تعشقه رغما عنك..
- بجد أنت بتصعبها عليا.. مش عارفه أشكرك على ايه ولا ايه.
  - وأنا مش عاوزك تشكريني أنا عاوزك بس تحسى بيا.. تحسى بحبك فى قلبى.
  - بس يا باسم...
  - باسم!! أنا مش باسم يا منه..أنا ممدوح
- قالها بوجع...
- أنا أسفه مكنتش أقصد...أتلخبطت
  - لا ولا يهمك بس واضح ان قلبك اللى نده مش لسانك..
- أنا لازم
- أمشى أنا خلاص أظمنت عليكى.
- أستنى يا ممدوح متمشيش..خليك معايا.

- لا معلى لازم أمشى مليش مكان هنا.

ذهب ممدوح مكسور الخاطر وأنا بكيت بصوتا مرتفع فلا يوجد  
وجعا أشد من وجع الحب من طرف واحد فاللحظه التي نقع فيها  
فى الحب..

مثل اللحظه التي ندوس فيها على قشرة الموز! لحظة خاطفه  
تأخذنا من كل شىء ومن أى شىء وتذهب بنا حيث تريد هى...  
لا حيث نريد نحن؟

ذهبت تانى يوم للعمل رأيت كل الزملاء ملتفين حول باسم وتقى  
يهنون ويباركون. فاستغربت! انصدمت حينما علمت بخبر  
خطبتهم!

خطبتك أنتى يا تقى وعلى من؟ باسم! و أنتى وحدك كنتى  
تعلمى كيف أحبه فخيانتك لى كزلزال أفقد عقلى توازنه فأذا  
كان هو أوجعنى حين خاننى..فأنتى..قتلتينى ، فأحيانا تكون  
خيانه الصديق أشد وجعا

من خيانه الحبيب.. فبالله عليكى على صدر من أرتمى الان؟ من  
يمسح دموعى الان! من يستمع الى شكواى .. ويحنو عليا ، من

يتمص غضبي و يقاسمني دمعتي! تملكيت نفسي و أمسكت دموعي  
وتقدمت نحوهم

بكل برود وقلت: ألف مبروك انتو الاتنين فعلا طلعتو لايقين  
لبعض.

قلتها بمنتهى البرود والوجع ايضا و ذهبت الى مكتبي وأنفجرت  
من البكاء

دخل عليا ممدوح مكتبي فجأة شدني من يدي و ضمنى الى صدره  
ازدادت في البكا أكثر وكأني أحدثه بدموعي وهو لا يتحدث بأى  
شيئا فقط يضمني أكثر ويمسح دموعي بيده شعرت انني هدأت  
و ارتاحت من دفء حضنه

- مش عاوز أشوف دموعك دي تانى..فاهمه؟
- أنا موجوعة اوى يا ممدوح أقرب الناس ليا كلهم خانوني  
وجرحونى.
- أحمدى ربنا انه كشفلك حقيقتهم وأوعى تستسلمى  
للوجع دا..أرمى ورا ضهرك ودوسى على أى حاجه وكل
- حاجه ممكن توجع قلبك كفايكي بكا ودموع محدش  
يستاهل دمعتك.
- مش قادره أصدق اللى حصل بجد.
- متزعليش.. أنتى اللى زيك يتندم على فراقها انتى فرصه  
بتجى مره واحده ومنتعوضش..

- ممدوح انا بجد محتجالك جمبى متسبنيش.
- ومين قال أنى هسيبك..لو الدنيا كلها سابتك انا مش هسيبك..أنا لازق فيكى و متبت.

فأبتسمت فرحا و خجلا ايضا..

- ضحكتك حلوه اوى خليها ديما منوره وشك.
- انت بتكسفننى بكلامك دا.
- انا قايم خالص..هروح مكتبى عشان ألحق اخلص الشغل اللى عندى..متروحيش أنا هعدى عليكى نروح سوا.
- أوك ماشى..هتغدينى النهارده يعنى.

ممدوح ضاحكا:

- دخلنا على طمع بقا.. وبعدين خلاص مبقتش بعرف أكل لقمه من غيرك.
  - تصدق بجد أنت بقيت بتفتح نفسى على الاكل.
  - على الاكل بس أنا بقا نفسى بتتفتح معاكى على الدنيا بحالها.
  - أمشى يا ممدوح من هنا هتودينا فى داهيه.
- ذهب ممدوح الى مكتبه وفى نفس اللحظة التي أدار لى ظهره... افتقدته!!

مرت الايام وممدوح يشاركني كل شيئاً يهتم بأدق تفاصيلي حتى التفاصيل الغير مهمه احتواني بمعنى

الكلمة.. غاص بأعماقي. كنت أرى باسم وتقى كثيرا في الشركة ولكنى يوما بعد يوما لا يعد يهمني أمرهم فالحزن هو الشيء الوحيد الذي يولد كبيرا ثم ينتهى صغيرا جدا لدرجه لا نشعر به ممدوح نجح في انه يسرق قلبي ويشغلني عن العالم بأكمله وبدأت أبادله نفس الشعور وكنت أرى الفرحة في عيناه عندما يشعر بحبى له طلب يدى للزواج...

- منه أنا بحبك و عاوز أتجوزك
- تتجوزنى ! تتجوز واحده عرجه و بتمشى على عكاز؟
- دى حاجه متعبكيش ابداء يا منه.. ولو اى حد فكر كدا يبقى العيب فيه هو مش فيكى ..انا حبيت روحك مش شكلك ايه و بتمشى ازاي.
- ولما أمشى جمبك وأنا بعرج وماسكه العكاز.. ولا وانا قاعده جمبك فى كوشه و جمبى العكاز؟ مش هتتخرج من كل دا.
- أنا هبقى عكازك يا منه.. أنا عاوزك تتسندى عليا وبلاش التفكير الاهبل دا.
- بقا كدا يعنى أنا هبله..

- ايوه هبله ومجنونه وبحبك.  
- أنت فجأتني بالطلب دا أظن محتاجه فرصه أقعد مع نفسي أفكر وأصلى استخاره.

- فكري براحتك بس عاوز أقولك على حاجه كنت متعود  
اعملها لما يكون عاوز أخذ قرار عاطفي..

- افتحي الراديو النهارده قبل ما تنامي الساعة ١٢ نص الليل

على محطه ١٠٥,٣ وشوفى قلبي هيقول لقلبك ايه..!

ضحكت منه وهى تقول :

- أزاى يعنى هتبعثلي رساله مع أسامه

منير ولا ايه !؟

- لا أول أغنيه تفتحي المحطة دي عليها هي صوت قلبي

لقلبك

و هنشوف هيجيلك ايه ..

- حلوه لعبه البخت دى أما نجرب ونشوف بس عارف لو حظى

جه على أغنيه حزينة هوريك بقا أنت حر.

- اعملى زى ما قولتلك وانا كمان هفتح نفس المحطه فى الوقت دا وأنا مجرب الموضوع دا كذا مره و بيصيب على طول.

ضحكنا سويا وأنا أقول له :

- شوفت مين اللى طلع مجنون دا أنت ليك طقوس عجيبه يا جدع.

وبعد أن تناولت وجبه العشاء جلست لا شاهد التلفاز ولكن شعرت بالملل الشديد فأنا لا أحب الوحدة فشعرت بالنعاس جدا ، فذهبت الى الفراش لكى أنام ولكنى تذكرت ممدوح وتذكرت حديثه لى وطلبه للزواج منى فطار النوم من عيني فقممت من فراشي وذهبت لأتوضأ واصلى استخاره لعلى ألقى الجواب الصحيح وبعد أن انهيت صلاتي توجهت مره أخرى الى الفراش وظللت أفكر وبصراحه لم أجد سببا واحد يجعلني أرفض أنسان يعشقني من كل قلبه هكذا ولن أنكر انني بدأت التعلق به أيضا وفى هذا الأثناء

قطع صوت رسائل الواتس صوت أفكاري فقد كانت رساله من ممدوح

- أنا عارف أن أكيد مش جايلك نوم ولسه صاحية افتحى  
بقا الراديو زى ما قولتلك أنا كمان هفتح أهو .

فتحت الراديو وأنا أضحك على ممدوح و طقوسه العجيبه  
فأحيانا يتصرف كالأطفال ولكنى أحببت ذلك فيه. أول ما  
فتحت الراديو على تلك المحطه صدمت وتعجبت بشده من صوت  
أليسا وهى تقول :

( موعوده بيك بيك تبقى أنت نصيبى وقسمتى )

ابتسمت وأنا أستمع الى الأغنية وأغمضت عيني وأنا أتذكر  
مواقضى مع ممدوح وشعرت بقلبى ينبض له للمره الاولى، فوقت  
على رنت رسايل الواتس فقد جأتنى رساله من ممدوح

- شفتى بقا قلبى بيقول لقلبك ايه انتى بقا قلبك بيقول  
لقلبة ايه ؟

أرسلت له كلمه واحده فقط أخجل أن أقولها وهو أمامي  
- موافقه..

- لولولولولى ( أموشينات قلوب ورقص ) دا أنا هعمل لولولى  
فرح.

ذهبت تانى يوم الى العمل وأنا أشعر بالسعادة وبالخجل  
ايضا، وجلست فى مكتبى أتناول قهوتى الصباحيه دخل عليا  
ممدوح بابتسامته الجذابه وروحه المرحه

- عاوزين نبل الشربات.

لم أستطيع النظر فى عينه فاحمرت وجنتى بشده و زاغ بصرى  
فى جميع أنحاء المكتب الا عيناه، كنت أتلاشى النظر بهم  
وتوترت كثيرا

- شربات ايه اللى عاوز تبله انت داخل سوبر ماركت، وبعدين  
أنت قديم أوى الناس اللى بتشرب شربات انقرضت من  
زمان.

أرتفع صوت ضحكنا معا فقال لى وهو يضحك:

- خلاص يا ستى بلاش شربات نبعث نجيب المأذون على  
طول أحنا لسه هنبل ونشرب.

حاولت السيطرة على شعور الخجل الذى أشعر به وأقلب الحديث  
مزاحا

- أنت بتقول أياه وبعدين بقا قولى أنت أكيد لىك حد  
قريبك ولا صاحبك شغال فى المحطه دى صح؟!

ممدوح وهو يضحك بصوت مرتفع :

- لا والله معرفش حد شغال هناك ولا فى الراديو ولا التلفزيون أصلا، دى كانت عادة متعود عليها من زمان، بس أيه رأيك فى الأغنيه جامده مش كدا؟
- لا بقا يبقى أكيد أتصلت بالمحطه وأخترت الأغنيه دى ، دا أكيد برنامج ما يطلبه المستمعين صح كدا..

ممدوح هامسا وهو يقرب منى:

- لا دا ما يطلبه قلبى وحياتك.
- شعرت بالخجل واحمرت وجنتى بشده وابتعدت عنه وجلست على كرسى مكتبى

- طب يلا بقا من هنا هنرش مياه، عندى شغل كتير لازم أخلصه النهارده عشان ألحق أروح فى ضيوف يمكن يجو عندنا النهارده.

- ضيوف مين ؟

- أصل أنا فى عريس متقدملى وهيجى النهارده يقابل أهلى.

ممدوح بتعجب وغضب شديد:

-

- ننععم ياختى ، طب تبقى خلى حد كدا يقرب منك ولا  
يفكر يعملها

قطعته بنبره ضاحكه:

- هتعمل ايه يعنى وبعدين هو بيحبني

وأنا بدأت أحس بحاجه ناحيته.

ممدوح والشرار يتطاير من عينه قرب من كرسى مكتبى ولفه  
بعصبيه الى الجانب الذى يقف فيه أمامى وأقترب من وجهى وقال  
بنبره محذره شعرت بأنفاسه الحاره تصتدم بوجهى:

- أنتى بتعتى أنا يا منه ومش عاوز أسمعك بتجيبى سيره

راجل تانى على لسانك عشان زعلى وحش.

- طب وسع كدا بس ، مين اللى قال أنى جيبت سيره راجل

تانى هو أنت مش ناوى تدخل البيت من بابيه يا باشمهندس ولا  
هو لعب عيال.

ممدوح وقد بدأت ملامح وجهه تتحول من الغضب الى ابتسامته  
الجميله :

- أيوه كدا أظبتي كلامك.

قطع حديث ممدوح صوت باسم وهو يدخل المكتب غاضبا:

- دا أحنا نجيب كوبيتين لمون بقا للحبيبه عشان دى مبقتش شرکه محترمه دى بقت كازينو العشاق.
- لا دا أحنا اللى هنبعتلك كوبيه شربات حلاوه الخطوبه، مش أنا ومنه أتخطبنا مفيش مبروك.
- لا أزای ألف ألف مبروك بس دا مكان شغل يا باشمهندس والمكتب دا للشغل مش للمواعيد الغراميه.

فقال بنبره غاضبه:

- لو سمحت يا باشمهندس مسمحكش تقول كدا، ممدوح كان جاى ياخذ منى التصميمات اللى خلصت، أتفضل يا ممدوح أنا خلصتهم.

أعطيت ممدوح اللوحات وأخذهم وأنصرف وهو ينظر لباسم نظره غاضبه ثم أنصرف باسم ، وافقت على الزواج من ممدوح ، وذهبت أنا و هو الى منزل والدى وتعرف على أمى واخواتى وطلبنى منهم ، وأعلننا خطبتنا أمام الجميع ، قضيت أجمل أيام حياتى بمعنى الكلمه ، ممدوح انسان متفاهم وقلبه حنون ، تعديت معه مرحله الحب والعشق فأصحت أتنفسه ...

تزوجنا وكان يوم زفافنا رائعا بحضور الاهل والاصدقاء،  
 وكنت أشعر أنني أسعد مخلوقه على وجه الأرض كلما  
 نظرت الى ممدوح وهو يجلس بجانبى ببدلته الأنيقه  
 ويمسك يدي وأنا أرتدى فستانى الأبيض حمدت الله  
 كثيرا على نعمته الذى عوضنى بها بعد كل ذلك الصبر،  
 ذهبنا الى عش الزوجيه حملنى ممدوح وصعد بى درجات  
 السلم وهو يضحك من شدة الفرح

- أدخلى برجلك اليمين ياأحلى عروسه فى الكون كله.

دخلت وأنا أشعر بالخجل الشديد لاحظ ممدوح ذلك فحاول  
 تهدأتى

- شكلك حلو وانتى مكسوفه كدا، تعالى نتصور بالفستان  
 والبدله

وبعدين ادخلى غيرى والبسى أسدالك عشان نصلى.

دخلت غرفتى وبدلت ملابسى ومسحت مساحيق التجميل من  
 وجهى ، وارتديت اسدالى وخرجت من الغرفه وجدت ممدوح قد  
 تؤضا وأشار لى الذهب للتوضأ، صلينا ركعتين ثم وضع يده  
 على رأسى وقال:

- اللهم أنى أسالك خيرها وخير ما أوّتيت بها عليا

أمسك يدي وأجلسنى بجانبه وقال بنبره حانيه وهو ينظر فى  
عيني:

- أنا حاسس دلوقتى أنى مش عاوز حاجه تانيه من

الدنيا خلاص غير أنى أفضل باصص فى عنيكى

الحلوه دى وبس وأنتى حاسه بأيه ؟

- أنا حاسه أنى جميله.

- أنتى جميله..أجمل من أنى أستاهل تحبينى.

- لا أنا حاسه أنى جميله عشان أنت بتحبينى، بشوف

نفسى فى عنيك وانت بتبصلى أنى أحلى ست على

الكوكب.

- أنتى فعلا أحلى ست على الكوكب وربنا يقدرنى

وأقدر أسعدك

وأفضل اخليكى وردتى الجميله اللى عمرها ما هتدبل ابدا

عشان هفضل اسقيها حب وحنان لآخر لحظه فى عمرى.

مرت شهور تزوج باسم وتقى ، تقى الان حامل؛ فى أول

زواجهم

كانوا سعداء الى حدا ما.. لكن بعد ذلك تغير باسم معاها وأبتعد عنها وهى أيضا تغيرت كثيرا؛ كانت دائما حزينه وذابله فتغيرت ملامحها و تغير مظهرها ايضا. كانت تشتكى دوما من معاملته باسم الجافه واهماله لها وعلاقاته الكثيره؛ وهو ايضا بدأ يشتكى من عدم اهتمامها به وعدم أهتمامها بمظهرها وبعد أن أنجبت اصبحت لا تأتى الشركه ولم أعد أراها.. باسم كان يغضب كثيرا عندما يرانى سعيده مع ممدوح و يتبادل الحب دائما؛ ممدوح كان يسقيني حبا واهتماما فكنت أزدهر وأتألق كالورده أشع

عبيرا و سعادته.. ولكن الشئ الوحيد الذى يحزننى أننى لن أنجب أطفال ممدوح لاحظ ذلك فأخذنى يوم الأجازة للملاهى

- بصى بقا أنا عاوز أقولك على حاجه.. أنا عارف أن موضوع عدم الحمل مضايقك.. بس من النهاردة أنتى
- أعتبرينى أبك زى ما أنا بع تبرك بنتى.. وهقولك يا مامتى
- لا يا ممدوح أنت مش بس أبنى.. أنت كلى.
- وأنا يا حبيبتى مش عاوز عيال أنا عاوزك تفضلى أنتى بنتى الوحيده وحببتى المدللة.

- بس أنا كان نفسى يكون لى حته منى ومنك تكبر قدام عنينا...
- طب ما أنا كلى على بعضى قدامك أهو.. ولا أنا مش كفايه عندك.
- يا حبيبي انت عندى بالدنيا و الناس كلها.
- مرت الأيام وممدوح يعاملنى كأبنته الصغيره وأنا أعتنى به كأنه ابنى الوحيد وفى يوم تهجم عليا باسم فى مكتبى باسم وهو يقترب يحاول يمسك يدي:
- منه أنا بحبك..أنا عرفت قيمتك لما ضعيتى منى.
- أبعد عنى يا باسم..أنا ست متجوزه وبعشق جوزى وكلامك دا ملوش لازمه.
- مش قادر أبعد عنك أكثر من كدا كل مابشوفك معاه بتجنن.
- ياباسم عيب عليك انت متجوز وبقيت أب.
- انا بجد ندمان أنى سيبتك..أنا أزاى كنت غبى وسيبتك تضيعى منى.. وأتجوزت واحده مبحبهاش.
- بس أنا بقا بحب جوزى وأنت خلاص انتهيت بالنسبه لى.
- انتى كدابه..أنتى بتحبينى انا.. هتفضلى تضحكى على نفسك لحد أمتى.
- وأنت خاين و أنانى..أنا فعلا كنت بحبك وانت اللى أتخليت عنى..

وفكرت فى نفسك وبس. دخل ممدوح أثناء الحديث غاضبا

- أنا بجد مش قادر أصدق اللى أنا شيفه وسمعه دا. جريت على ممدوح وعناقته ، ولكن كان عناقه باردا
- ممدوح ألحقنى يا حبيبي بيتهجم عليا.
- وايه اللى أنا سمعتك بتقولى دا!؟
- قولت أيه!! بقول كنت.. صدقنى أنا معرفتش طعم الحب الحقيقى اللى معاك انت.
- قدامى على البيت ومن النهارده مفيش شغل تانى وهتقعدى فى البيت.
- وأنت كمان ياريت متجيش تانى وأقعد جمبها فى البيت على طول.

ممدوح وهو يشدنى من يدى :

- الأرزاق على الله.

ركبنا السياره ؛طول الطريق أحدثه لا يرد عليا؛ أوصلنى الى البيت وتركنى وذهب ولا أدرى الى أين ذهب؛ حضرت الغداء وانتظرتة أكثر من ثلاثة ساعات لن يأتى أتصلت عليه لن يرد عليا بعث له رساله:

( صدقنى أنا فعلا حاسه أنى بموت وروحي بتتسحب منى؛  
متعذبنيش أكثر من كدا ؛ طب رد بس أسمع صوتك وأطمئن  
عليك)

أتصلت به مرة أخرى رد عليا

- ألووو يا حبيبي أنت فين..متعذبنيش أكثر من كدا  
حرام عليك.

ممدوح لن يرد

- طب قولى كلمه واحده؛ سمعنى صوتك أنت جبت  
القسوه دى كلها منين أنا متعودتش منك على كدا..  
صدقنى مليس ذنب فى حاجه.

- أنا مش راجع البيت يا منه غير لاما ألقى شغل.

- يا حبيبي تعالى محتاجه حضنك أوى تعالى متعملش  
فى نفسك و فيا كدا.

- مش قادر سبيني دلوقتى سلام.

أغلق الهاتف... جلست أنا أبكى غفوت على الأريكة حاضنه  
صورتها بين يدي؛ شعرت بيد تحملني من وسطى الى أعلى  
فتحت عيني خائفه و مخضوضه ولكنه ممدوح حملني بين  
يديه بكيت عندما رأيته ولفيت ذراعى

حول عنقه و قبلته؛ أدخلني الى سريري و جلس بجوارى

- أنا أسف مكنش ينفع أسيبك. وضعت يدي على فمه
- بس متقولش حاجه.. خدنى فى حضنك وبس.

أستيقظت صباحا على صوت تحركات ممدوح داخل الغرفه

- حبيبى.. صباح الخير.
- اسف يا حبيبتى قلقتك من النوم معلش.
- أنت بتلبس ورايح فين كدا؟!!
- نازل أدور على شغل ، ولا عاوزنى أفضل قاعد  
جمبك.. أنا شخصيا عاوز كدا أفضل جمبك  
متحركش.

- أيوه بقا على فكره عاوزاك تقعد جمبى.. ريح من  
الشغل يومين..

خلاص الدنيا هتطير.

- القرشين اللى معانا هم اللى هيطير يا حبيبتى.. أنا  
خلاص لبست بقا أدعيلى يا ماما.

- روح يا بنى ألهى تتفتح فى وشك كل الابواب  
المقفوله.

ممدوح ووهو يقبل رأسى و يدى:

- أحلى دعوه من احلى أم فى الدنيا.

- طب أستنى أحضرلك الفطار قبل ما تنزل.

- الفطار جاهز على السفره يا سمو الملكه

- طبعا ملكه..عشان حبيبى ملك ذهبها الى السفره

ضاحكين وبعد الفطار ودعتة عن باب الشقه ودعيت

له. حضرت الغداء وجلست فى أنتظار ممدوح؛ فتح

الباب ودخل مبتسما ومعه الورد وقطعه الشكولاته

مثل كل يوم

- الوردہ دی بتقولک انتی اُحلی منی والشکولاتہ دی  
بتقولک انتی اُطعم منی.

- وأنا بقولک أنت رزقی فی الدنيا اللى ربنا عوضنى  
بیه..طمنى

عملت ايه يا حبيبي؟

- متقلقيش يا روحى ربنا هيدبرها ان شاء الله
- يا حبيبي انا مش قلقانه طول ما انت معايا وبخير  
ضميته الى صدرى ومسحت له على رأسه
- مش عاوز تشيل هم حاجه..أحنا نبيع عربيتى و نفتح  
مكتب ديكور أنا وأنت.
- هى فكره كويسه..بس هنبيع عربيتى أنا
- ايه أنا دى هو أحنا مش واحد..روح واحده.
- معلش يا منه عشان أبقى مرتاح.. صدقيني مش  
هكون مرتاح لما اخليكى تبيعى حاجتك دا واجب عليا  
أزودلك حاجته مش أنقصه.
- طب قولى بقا أحبك أكثر من كدا أزاى أنا بحبك  
أوفر دوس أعمل ايه تانى.

ممدوح ضاحكا :

- لسه موصلتيش لدرجه عشقى ليكى
- طب احنا مش هنتحدى بعض مين بيحب التانى اكر
- عشان واثقه أننا الاتنين بنحب بعض أكثر من بعض
- أثناء الحديث يرن هاتف ممدوح؛ اتصال من البلده التى
- يعيش بها أهله
- وبلغه أحد أقاربه بوفاه والده.

- مش معقول! دا أنا لسه مكلمو الصبح.. كان نفسى
- أشوفه ياربى..
- لا حول ولاقوه الا بالله..أنا لله وأنا إليه لراجعون..
- أنت مؤمن والبقاء لله.
- الدوام لله..الله يرحمه ويغفرله يلا بسرعه جهزى
- نفسك هنسافر.

سافرنا الى البلد وحضرنا الدفنه؛ والعزاء وبعد أسبوع  
قرر ممدوح أننا نعود؛ ونأخذ أمه تعيش معنا وبعد عودتنا  
الى المنزل لن تعود حياتنا كما كانت

- دى أوضتك بقا يا ماما..أدخلى أرتاحى شويه من
- السفر.

- وأنت رايح فين..
- أنا داخل أنام شويه
- لا تعالى نام معايا فى الاوضه أنت هتسبنى يا ممدوح.

ممدوح ينظر ليه نظره قلبه الحيله ويدخل مع أمه وتركنى وحدى ، أعلم أنها وأمه ولا يحق لى أن أغار منها ولكن شعرت بالوحده بدون ممدوح معى بدأت أمه تغير من شده أهتمام ممدوح بى ولكن شعرت بالوحده بدون ممدوح معى فقد تعاودت على النوم على صدره لا أستطيع النوم الا وانا اشم رائحته بجوارى وأشعر بانفاسه وأستمع لدقاته حاولت النوم فى تلك الليله ولكن فشلت حتى أذان الفجر قمت توضأت لأصلى وجدت ممدوح ايضا خارجا من الغرفه ويبدو عليه الأرهاق وعدم النوم

- صباح الخير يا حبيبتي.

- هو انا عرفت انام اصلا ولا أدوق طعم النوم وانت مش

جمبى

ممدوح وهو يقترب منى ويضم رأسى الى صدره الحانى:

- يا حبيبتي ومين سمعك انا كمان صاحى بتقلب على  
السرير زى اللى ضايع منه حاجه وبيدور عليها، بس  
معلش دى برضو أمى ومينفعش أزعلها.

- لا يا حبيبى انا مش زعلانة انا بس اللى اتعودت عليك  
بزياده ومش عارفه انام من غيرك يلا بقا نصلى الفجر  
جماعه.

وبعد ان انتهينا من الصلاة نام ممدوح بجانبى وانا أضع  
رأسى على صدره كعادتى حتى شعر أننى خلدت الى النوم  
ثم ذهب لينام بجوار أمه حتى لا تغضب عندما تستيقظ  
ولن تجده. وكانت دائما تعيب فى كل شىء أصنعه أو  
أفعله دائما تحاول التقليل من شأنى وهو لا يتخذ اى  
موقف، ذهب ممدوح ليبيع سيارته لنجهز مكتبنا الجديد  
وتركنى معاها فى المنزل كنت دائما أشعر بكرهها  
الشديد لى؛ كانت تتحدث معى بطريقه وحشه؛ كنت  
أتحملها فقط لأجل خاطر ممدوح

- أنتى مبتكشفيش وتعالجى ليه.. بقالكم كذا سنه  
متجوزين ومحملتيش.. أنا عاوزه أفرح بعيال ابنى  
قبل ما أموت

- ربنا يديكى الصحه وطول العمر ياماما..أحنا فعلا  
كشفتنا وكله بأمر ربنا.
- لا مينفعنيش الكلام دا..دا أبني الوحيد ونفسى  
أشوفله حته عيل.
- حاضر يا ماما اللي تشوفيه هنروح نكشف تانى
- آااه ما اكيد العيب منك..أنا أبني سليم وزى الفضل  
أنا مش عارفه هو ساكت على كدا كل دا ازاي..  
شكلك عمله له عمل و ساحراله.
- هو ليه لما الراجل يبقى بيحب مراته وبينهم تفاهم  
وأحترام تقولو سحراله!! لا أنا بقا ساحره مش  
سحراله.
- أومال لو مكنتيش عرجه واخداك بعيبك كنتى  
عملتى ايه؟!
- عيبى..أول دى حاجه متعبنيش على رأى جوزى.. ثانيا  
أنا ساحره بمعاملتى الطيبه وحبى له و أسلوبى معاه  
وهو مرتاح معايا.

وأثناء الحديث فتح ممدوح باب الشقه ودخل

- السلام عليكم..عاملين ايه ؟

- الحمد لله..حمدالله على السلامه يا حبيبي قبلنى على  
جبينى ولكن لا يعطنى الورد و قطعته الشكولاته  
شعرت بالغضب فهذه اول مره ينسى أن يحضرهم لى  
قبل رأس أمه و يداها

- ابن حلال كنت لسه بقول لمراتك أهو أنتو أزاى سكتين  
كدا ومش بتكشفو عاوزه أفرح بعيالك يا بنى  
يا أمى كل شىء بأوانه وكله بأيد ربنا.  
- ربنا قال اسعى يا عبد وانا اسعى معاك.. يا بنى كل اللى  
اتجوزه بعدك عيالهم مشاء الله دلوقتى دخلين المدارس  
أهو.

دخلت أنا غرفتى وفضلت الباب و جلست أبكى دخل ممدوح جلس  
بجوارى ووضع رأسى على كتفه

- متزعليش يا منه من كلام امى معلش ست كبيره  
أستحملها زى والدتك.  
- دى مش اول مره تجرحنى يا ممدوح وقبل ما تجى قالتلى  
كلام أفضع من كدا.. بجد مش قادره أستحمل.  
- عشان خاطرى.. دى أمى برضو مقدرش أزعلها قوليلى  
اعمل ايه؟!

- متعملش حاجه يا ممدوح..أنا تعبت.. حتى انت كمان  
أتغيرت معايا

مبقتش مهتم بيا زى الاول.. وبقيت أغلب الوقت تقعد  
معاها فى أوضتها لوحدكم لا و تنام عندها وتسبني لوحدى  
ممدوح ضاحكا :

- يا عبيطه بتغيرى من أمى!!
- لا يا ممدوح دى مش غيره بس متهملينش كدا..حتى
- النهارده نسيت تجبلى الوردہ والشكولاته زى كل يوم
- طب غمضى عنيكى كدا..
- لا مش هغمض حاجه
- غمضى بقا متبقيش رخمه
- اهو يا سيدى

ممدوح يطلع الوردہ والشكولاته من جيب الجاكييت

- شفتى بقا أنى مقدرش أنساكى ولا أتغير معاكى..
- بس قولت أدهملك وأحنا لوحدنا أحسن.

وقبلنى واخذنى فى حضنه ، وفجأه فتحت والدته باب  
الغرفه دون أستأذن

- أحنا مش هنتغدا ولا ايه.. دخلتى يعنى قعدتى على السرير.. هو جوزك اللى راجع من بره جعان دا مش هتأكله.
- خلاص يا أمى أنا أصلا مش جعان.
- أزاى يا بنى دا أنا قاعده مستنيك عشان نتغدى سوا
- حاضر يا أمى هقوم أحضرك الغدا
- خرجت والدته من الغرفة وهى تتمتم بسخريه:
- يفرحتى بيك أنت اللى هتقوم .. انا قولت سحراله.
- شايف يا ممدوح عشان تصدقنى.
- معلىش يا حبيبتى قولتلك استحملى عشان خاطر حبيبك.. ولا أنا
- مليش خاطر عندك..عموما خليكى مرتاحه ، وانا هحضر الغدا على السفره.
- خلاص يا ممدوح .. روح أقعد على السفره ، انا داخله
- أجهز الاكل.
- طب يلا نجهزوا سوا.

مرت أيام على نفس الحال دائما كانت تتعمد تستفزنى بكلامها وأسلوبها معى وانا كنت أتحمّل لأجل خاطر ممدوح وكانت تشجعه على الزواج بغرض الانجاب و ما كان يغضبنى منه موقفه السلبي ولا يدافع عنى ولا يرد كرامتى أصبحت أبتعد عنه وكنت دائما حزينه وهو كان مشغول كثيرا فى تجهيز المكتب وبدأ يتعمد أن يأتى متاخرا هربا منى شكوانا له ومشاكلنا معا أصبحت أشعر بوحده شديده وبدايه اكتئاب ذهبت يوما الى التنزه بمفردى وجلست فى كافيه كنت معتاده الجلوس به ولى فيه ذكريات قديمه أنا وباسم ولكن يالها من صدفه..أنه باسم جالسا أيضا بمفرده! تعمد عدم النظر إليه و حاولت أن أدارى وجهى عنه..ولكن هو شاهدى و تقدم نحوى:

- ازيك يا منه عامله ايه؟

- الحمدلله..ازيك أنت؟

- ياااا بقالى كام سنه مشفتكيش..

بس لسه قمر زى ما انتى متغيرتيش.. تعالى شوفى صحبتك بقت شبه امنا الغوله.

- وانت يا باسم لسه زى ما أنت متغيرتش.. ديما باصص على الشكل والجمال الخارجى وبس ومش بتفكر غير فى المظاهر الكدابه.

- لا والله يا منه أنا بجد عرفت قيمتك و نفسى تسمحينى أنا جرحتك و ظلمتك معايا.

- المسامح ربنا معلىش لازم أمشى أنا أتأخرت

- أنتى جايه لوحدك ليه..أومال فىن ممدوح؟

- ممدوح فى مكتبه عنده شغل

- مكتبه؟! مش بقولك عرفت قيمتك أنتى عظيمه بجد يا منه..

- بعد اذنك لازم أمشى

باسم وهو يشدنى من يدى :

- فاكراه المكان دا كنت نتقابل فيه على طول.. وشاف أجمل

أيام حبنا..أكيد منستيش عشان كدا جيتى هنا تانى

- أنا مش فاكراه حاجه سيبنى بقا عاوزه امشى

- لا أنتى بتكدبى على نفسك يا منه أنا واثق لسه بتحببنى

ومنستيش زى ما انا مش قادر أنساكى كدا.

عودت الى المنزل فتحت باب الشقه لا أشاهد أحد ولكنى استمع

الى صوتهم من داخل الغرفه تقدم نحو الصوت

- أسمع بس كلامى دى رحاب دى زى القمر و ست بيت شاطره و متعلمه برضو
- لكن يا ماما .. أنا خايف أجرح منه
- هى بقا بصراحه لو بتحبك كانت هى اللى تقولك أتجوز مش كفايه أنت راضى وساكت عليها كل دا وعمرك بيجرى
- يا ماما أنا بحبها وهى بتحبنى ومرتاحين كدا
- مرتاحين اى بس.. دى حياتكم كئيبه مفهاش روح هاتلك حته عيل يملى عليك حياتك وتفرح بى
- بس أنا مشوفتش رحاب دى خالص قبل كدا

### دخلت أنا غاضبه

- والله طب ما تروح تشوفها مستنى أيه؟
- أنتى جيتى أمتى؟
- ايه قله الادب دى واقفه تتصنتى عليا انا وابنى.

- ما ترد أنا بقيت قليله الادب وانت واقف!
  - ايوه أنتى واقفه تتصنتى عليا ليه؟
  - أتصنت ايه يا أستاذ..أنا سمعت وانا داخله
- وبعدين أنت هتسيب الموضوع و تقلب الترابيزه عليا.

ممدوح يشدنى من يدي:

- تعالى بس ندخل نتكلم جوا.
- ولا جوا ولا بره أنا سايبهاكم وماشيه
- هو ايه اللى ماشيه مفيش خروج
- لا ما هو انت مش هتقعدنى معاك بالعافيه.. ولا افضل قاعده لحد ما تدخل عليا بالعروسه.
- عروسه ايه انتى عبيطه
- سيبنى يا ممدوح بجد مش طايقه أقعد هنا.
- سيبها يا بنى بكره هى تلف وترجع لوحدها.. هو حد من اهلها بيعبرها ولا بيطقها.
- كفايه بقا ياماما.. لوسمحتى أسكتى.

اخذت شنطتى و خرجت من المنزل؛ ذهبت الى منزل والدتى وجلست فى غرفتى بمفردى ظلمت ايام على ذلك الحال لا أتحدث مع أحد ولا أخرج من غرفتى؛ أشعر بالخيبه والخذلان مره اخرى ولكن هذا المره من الذى أقسم أنه مختلف ولن يخذلنى مهما كان... فأيقنت حينها أنه لا يخذلنى أحد!! أنا من خذلت نفسى ، عندما راهنت على أنهم أوفياء. وضعت رأسى على المخده.. أشعر بوجع فى قلبى وأنا أسترجع ذكرياتى مع ممدوح و حديثه لى

أمسكت هاتفى لاتصفح صورنا معا؛ لا أدرك نفسى الأ وأنا  
أقبل هاتفى !! مغموضه العينين أتخيل أنى أقبلك أنت..

\*\*\*\*\*

" حقا من لا يقبل الصور ما ذاق الحب يوما " هل ياترى  
هو ايضا يشتاق لى.. أمسكت هاتفى وقعت عينى على  
الساعة وعندما رأيتها الثانية عشر تذكرت ممدوح وهو  
يقول لى عاوزه تسمى صوت قلبى لقلبك وابتسمت وأنا  
امسح دموعى التى تنساب من عينى وفتحت الراديو على  
تلك المحطه فأخبرنى عمرو دياب برسالة ممدوح لى:  
حنيت لعنيك حنيت، حنيت واشتقت ياريتنمت وأنا حاضنه  
صورته بين يدي؛ عندما

أستيقظت وجد نفسى مرهقه للغايه و عينى منتفخه من  
كثرت البكا ليلا، دقات قلبى موجعة، نظرت فى المرايا  
رأيت وجهى أصفر شاحبا، أشفقت على نفسى لدرجة البكاء  
و رددت : أنا قويه لن أستسلم لحزننى، لن أعطى فرصه  
لأحد يكسرنى ،

لن أهزم.... أنا خلقت لأقاوم و أزدهر..لن أذبل.

أرتديت ملابسى و ذهبت لأتمشى بمفردى شاهدت أمامى  
المكان المفضل الذى كنت أجلس به أنا وباسم منذ زمننا  
لن أأتى الى هنا؛ ترددت فى الدخول ولن شيئاً من الحنين  
شدنى الى الداخل؛ بحثت بعينى على نفس الترابيزه التى  
كنا نجلس عليها سويا وجدتها مشغوله، كان شاب جالسا  
عليها دققت اكثر؛ يالها من صدفة ! أنه باسم!! أدرت له  
ظهري و جلست حتى لا يرانى،

- ازيك يا منه..ايه الصدفة الجميله دى..
- الحمدلله كويسه..فعلا صدفة غريبه أننا نتقابل هنا
- لا مش غريبه يا منه ولا أنتى نسيتى أن دا أكثر مكان  
بنحبه احنا الاتنين.
- ياريت تتكلم عن نفسك وبس.. محدش غيرى يعرف أنا  
بحب أيه وبكره ايه.
- لحد امتى بقا هتفضلى تضحكى على نفسك، لحد امتى  
هتفضلى تمثلى البرود بتاعك دا.
- برود !! لا يا استاذ أنت دا مش تمثيل..دا حقيقى مفيش  
صدقنى ذره أحساس فى قلبى نحيتك.

- أه صحيح نسيت أسالك! فين ممدوح مجاش معاكى ليه؟
- ممدوح مشغول اليومين دول فى مكتبه.

- مكتبه !! بقا عنده مكتب.. بجد أنتى اد ايه عظيمه يا منه  
وظموحه، مش زى تقى فاضيه من جوا حاجه كدا ماسخه،  
منظر من غير طعم.

- أنا عاوزه أمشى...
- تمشى ايه هو انتى لحقتى حتى تشربى حاجه!
- لا معلىش مره تانيه بقا.. لازم امشى دلوقتى.

باسم يشدنى من يدى:

- بقولك أستنى..طب هو صلك
- سيب ايدى ياباسم أنا عارفه السكه لوحدى.
- مش هسيبك تانى تضعى منى.. أنا بحبك و متأكد  
أنك بتحبنى زى ما بحبك..عنيكى فضحاكى.

شدت يدى بقوه وذهبت مسرعه نحو باب الخروج

وهو يلاحقنى وينده عليا لأتوقف.. ولكنى شعرت بدوخه  
شديده أفقدتنى توازنى صاح باسم وهو يمسكنى ويضمنى  
اليه قبل ان أقع وحملنى الى سيارته ولا أشعر بنفسى ألا  
وأنا داخل سيارته ورأسى مائلا على كتفه

ويداه تداعب وجهى و خصلات شعرى ويداه الاخرى ماسكا  
يدى بقوه؛

فعندما فتحت عينى قال لى هامسا " بحبك "

- سيبنى يا باسم أمشى عاوزه أروح.

- طب أهدي حاضر أنا هوصلك متنشفيش دماغك..

مينفمش بعد اللى حصل أسيبك لازم أوصلك.

\_ طب يلا وصلنى مستنى ايه ؟

- كنت مستنى اظمن عليكى.. هوديكى مستشفى الاول

نظمن شكلك تعبانة !

- لا أنا كويسه ودينى عند البيت.. فاكر العنوان ولا نسيت

!!

- يا منه أنا عمرى ما نسيته ولا نسيت اى حاجه تخصك.

- مفيش داعى للكلام دا لو سمحت عشان مغيرش رأى

وأنزل.

- لا خلاص.. خدى أشربى العصير دا. أوصلنى الى البيت و

نزل من سيارته فتح لى الباب وهو يسندنى؛ وفجأه رأيت

ممدوح أمامى، قد أتى ليصلحنى ولكنه فهم الأمر خطأ

تماما

- وأنا اللى جاى أصالحك وقولت هلاقيكى مستننى بشوق

ولهفه..

أتاريكى مش مضيعه وقت ومقضاياها.

- ممدوح ايه اللى أنت بتقوله دا؟ أنت فاهم غلط

- غلط يا هانم اللى انتى بتعملى دا.. سيبه بيت جوزك

وماشيه على حل شعرك.

باسم يضرب ممدوح بالقلم على وجه:

- أحترم نفسك

- هى حصلت بجد مشفتش بجاحه أكثر من كدا.. أنتى

طالق يا هانم وخلي اللى رامكى قبل كدا ينفعك.

تركتهم ودخلت الى المصعد، لا اتمالك نفسى بكيت بحرقه  
فجميعهم....جرحونى!! تم طلاقى من ممدوح ، دخلت غرفتى  
وقفلت على بابى ولكن هذا المره أشعر بأننى أختنق من كل  
شئ حولى أود الذهاب الى مكان بعيد حيث لا يعرفنى أحد، أود  
أن تحملنى طائره الى بلده بعيده لا أعرف سكانها، قررت أن  
أسافر لأدرس الفنون فى بلده أجنبيه

رتبت جميع أمورى وحجزت معاد طيارتى ولكن قلبى لن  
يطاوعنى على الذهاب وترك ممدوح لئلا بد حاولت أن أحدثه قبل  
معاد سفرى بيومين فقط، أشتقت له كثيرا لعلى أرجع بقرارى  
ولكن لن أستطيع محادثته

بعثت له رساله على الفيس بوك بمعاد سفرى ولكنه لن يفتح حسابه منذ يومين ولن يأتنى الرد ولا يشاهد حتى رسالتى توجهت الى المطار وأنا أشعر بثقل فى خطواتى، فعلى يقول لى اذهبى الحياه مفتوحه أمامك، أما قلبى فله رأى آخر فهو يرى أن لا حياه لى بدون ممدوح، انتظرت ان يأتى ليمنعنى أو على الأقل يودعنى لآخر مره

فى نفس الوقت كان ممدوح يشعر بالتعب الشديد وحرارته مرتفعه

وينام على فراشه ولكن أصابه الأرق ولا يستطيع الخلود فى النوم فظل يتقلب فى فراشه فسمعت صوت طائره محلقة فى الجو صوتها شديد وقريب جدا كأنها تطير فوق رأسى مباشرة وبعد عشر دقائق سمعت نفس صوت الطائره ثانيه ايضا صوتها قريب هكذا تعجبت قليلا ولكن لم اهتم

الاعندما سمعت صوت طائره للمره الثالثه فجأه نهضت وجلست فى فراشى محدثا نفسى: هو أنا نائم فى مطار ولا ايه غريبه أوى صوت الطائرات النهارده، هى الساعه كام؟ ولكن دون يدري تذكر منه وجدها الثانيه عشر منتصف الليل ، فتح الراديو سريعا فوجدها اغنيه رامى عياش: عم تضحكى وقلبك حزين صار البكى

بلون الحنين، قلبى انكسر حتى الصور عم بتقول ما حدا بيبقى على طول، قلبى وجعنى بيوم الوداع..

وبعد مرور عامين من الدراسه، حصلت على وظيفه هناك ، ولكنى أشعر بغربه و ووحده شديده كأن كل من حولى لا وجود لهم !.. حقا الشعور بالوحده مؤلم ولكنه مريح... وفى يوم أتى للعمل بالشركه شبان مصريين (وليد، عمر) شعرت بالفرح عندما سمعت أحدهم يتحدث

بلهجه بلدى، بدأت التعرف عليهم والتقرب منهم، أصبحنا أصدقاء نهون على بعضا الشعور بالغربه بدأت ألاحظ بأن عمر يتقرب منى أكثر

ويهتم بى كثيرا، يخلق الفرص ليتحدث معى. وأنا كنت أصدده دائما، حتى جاء اليوم وصارحنى بحبه لى

- انتى ليه يا منه كل ما أحاول أقرب منك تبعدينى.
- أنا راسمه حدود مع الكل يا عمر ومش هسمح لحد يتخطها.
- بس أنا حبيتك يامنه وانتى مش زى اى حد بالنسبه لى..
- أدينى فرصه وأنا اثبتلك دا.
- أسفه..وانا بالنسبه لى كلكم زى بعض.. ومعديش أدنى
- أستعداد أن أسمح لحد يتخطى الحدود دى تانى.

وبعد مرور أيام تلقيت هاتف من أخى بأن والدتى محجوزه فى المستشفى .

فستأذنت على أجازته شهر و عدت الى بلدى ذهبت الى المستشفى للاطمئنان على والدتى جلست مقيمه معاها فى المستشفى وبعد مرور يومين...

لمحت ممدوح جالسا على سرير فى غرفه سحب العينات و الممرضه تسحب منه الدم وكان شكله مرهق وحالته متدهوره تماما أخذنى القلق والفضول أيضا و دخلت الغرفه لأسأل الممرضه على شىء ما ممدوح صدم عندما شاهدنى وتغير وجهه فأزداد الأمر به سوءا..

- ممدوح !! سلامتك بتعمل ايه هنا؟

رد الممرضه فى لحال:

- مريض السرطان هيكون بيعمل ايه هنا..بيتفسح مثلا !!

- سرطان !! ياربى مش ممكن..ألف سلامه عليك ربنا

يشفيك و يقومك بالسلامه.

ممدوح لا يتحدث بأى شىء فقط بكى وفاضت عيناه، اقتربت منه ومسحت دموعه وأمسكت يده.

- مش عاوزه أشوفك دموعك دي أرجوك.. أنا عمري ما هنسى أنك كنت أول أيد تتمد عشان تمسحلى دموعى ولا عمري هنسى أنك الوحيد اللى كنت بتقولى مش عاوز أشوف دموعك، أنا كمان صدقنى مش عاوزه أشوفك دموعك عشان غالين عندى أوى.
  - مكنتش أتمنى أنك تشوفنى بالمنظر دا.. ضعيف وواقع مفيش حد يسندنى بعد ما مراتى اللى سيبتك عشانها باعتنى لما عرفت بمرضى دا.
  - أنت ليك دين فى رقبتى ولازم أرد هولك.. أنت ناسى أنك الوحيد اللى وقفت جمبى بعد ما كلهم خذلونى.
- ممدوح وهو بيكى بحرقه:

- أنا أسف.. خذلتك أنا كمان بس سامحيني أنا كنت راجعلك لاقيتك بعينى.
- أنا عمري ما بعتك يا ممدوح دا كان سوء تفاهم مش أكثر
- معقول أنا أزاي كنت غبى للدرجة دي.. أزاي بغبائى ضيعت كل اللى كان بينا كان لازم أكون واثق فيكى أكثر من كدا.
- حصل خير يا ممدوح المهم أننا لاقينا بعض تانى وكل واحد عرف قيمه التانى أكثر. أثناء الحديث دخلت والدته ممدوح والدته وهى تقترب منى بلهفه و تقبلنى :

- منه ازيك يا حبيبتى وحشتنى يا بنتى ؟
- ولكنى لن أنسى لها ما فعلته معى وأنها كانت سبب فراقنا
- الحمدلله.. ازيك انتى؟
- سامحيني يا بنتى .. أنا عارفه أنك لسه شايله منى بس أعتبرنى أمك و سمحيني أنا أسفه يا حبيبتى..
- وبقولك قدام أبنى أهو أحنا لو نلف الدنيا بحالها منلاقيش ضفرك يا بنتى.
- خلاص يا طنط مفيش داعى للكلام دا.
- أصيله يا حبيبتى.. نفسى ترجعى تنورى بيتك وانا هرجع بيتى فى البلد..وهكون مطمئنه ع ممدوح أكثر وهو معاكى أنتى يا منه.
- معلش ياطنط لازم أمشى عشان سايبه ماما تعبانه
- معلش يا طنط لازم أمشى عشان سايبه ماما تعبانه.
- ألف سلامه عليها..أنا هجى معاكى أظمن عليها.
- خرجنا من الغرفه أنا و والدته ممدوح.
- صدقيني يا بنتى ممدوح بيحبك اوى وعمره مفكر
- يحب حد غيرك..سامحيني انا السبب.
- خلاص يا طنط كلامك دا متأخر أوى.

- يابنتى ممدوح حالته صعبه وأكيد وجودك جمبه  
هيفرق معاه أوى.. طب أنتى عارفه مش أنا كنت  
عائشه

معاه هو مراته التانيه عمره مشوفته بيعاملها زى ما كان  
بيعاملك

كان عايش معاه تقضيه أوامر و خلاص من غير حب ولا  
روح.

دخلت أنا وهى غرفه والدتى و بعد أن سلمت عليها  
وأطمأنت عليها

خرجت وندت لى خارج الغرفه

- أرجوكى يا بنتى ترجعى لممدوح.. أرحمى قلب أم  
بيقطع على أبنها.

- وأنتى مرحمتينش ليه وأنا قلبى كان كل يوم  
بيقطع من غيرتك ليا و كرهك فى و فى الآخر  
فرقتى بينى وبين جوزى،

عاوزنى دلوقتى ليه تانى مش أنا العرجه المعيوبه.. مش دا  
كلامك.

- لا يا حبيبتى متقوليش على نفسك كدا..دى حاجه متعكيش أبدا ، العيب هو اللى أنا عملته لما عيرتك بحاجه ملكيش ذنب فيها وبأيد ربنا وأى بنى آدم معرض يحصله كدا، العيب الحقيقى يا بنتى فينا أحنا فى اخلاقنا و تصرفتنا مش فى شكلنا وظروفنا.العيب كان فىا أنا لما غيرت من مرات أبنى وحبته ليهيا
- كان لازم أفرح أنى أبنى راجل بجد وقادر أنه يسعدك مش أزعل من كدا وأتمنى لك المشاكل،وعرفت قيمه دا أكثر لما أتجوز اللى مش بيحبها و كنت ديما شايفه تعيس وحزين مبقتش بشوفه بيضحك الضحكه اللى كان بيضحكها هو معاكى.
- خلاص يا طنط أنا أصلا مقدرش أسيب ممدوح فى ظروفه دى ولازم أكون جمبه.. بس لازم أطمئن على ماما الاول.
- متشكره أوى يا بنتى... أنتى بجد أنسانه جميله من جواكى، اللى زيك لو نخسره نندم على عشرته سنين... ولى حق أبنى يحبك الحب دا كله.

تانى يوم ذهبت للأطمئنان على ممدوح فى غرفته وجدته جالس على سريره حزين ووالدته تتحايل عليه لياكل الطعام وهو لا يريد دخلت عليه بروح مرحه ووجه مبتسم

- صباح الخير..الموز بتاعى عامل ايه النهارده؟ دبت الروح فى قلبه ووجه عندما سمع صوتي ورآني.
- أنا تعبان طول ما أنتى بعيده عنى.
- ومين قال أنى بعيده عنك..آخر الطرقة قول بس منه وألف من هيدلك.

ممدوح ضاحكا:

- ألف هيدلنى دا أنتى مشهوره هنا بقا.
- أو مال ايه يابنى مش اى حد أنا..مسيطره برضو.
- مش بقولك مبشوفش ضحكته دى غير وهو معاكى.
- انا فعلا بحس أنى ميت من غيرك وروحى غيبه عنى..
- الروح مش بترد فى غير لما بشوفك.. متسبنيش محتاجلك جمبى وغلوتى عندك وحياه كل حاجه حلوة ما بنا أدينى فرصه أخيره بس ما تسبنيش..
- ده أنا أموت لو فكرت تسبينى تانى.
- بعيد الشر عنك.. ومين قالك أنى هسيبك؟!

- طول عمرى بقول الحب رزق وأنا ربنا رزقنى بيك أنت..
- بحبك يارزقى..أنا هبقى أحسن وأنتى جمبى

دا أنا كنت بدور عليكى فى وشوش الناس، بتخيلك فى كل

مكان

صاحى أو نايم شايفك قدامى.

- طب يلا بقا يا أستاذ تأكل الأكل دا كله عشان تبقى شاطر
- كدا و تخف بسرعه و نرجع بيتنا بقا.

- أيوه بقا أنا كدا نفسى أتفتحت أكل الأكل اللى فى

المستشفى كله..بس شرط أنتى اللى تأكلنى بأيدك.

- \_ هههههه لا متفتحهاش أوى كدا العيانين الغلابه دول
- ذنبهم ايه.

- ربنا يسعدكم يا ولادى و ميحرمكوش من بعض أبدا

- ولا يحرمنا منك يا ماما

- أول مره تقولى يا ماما.. بس طالعه منك زى
- العسل.

مر يومين خرجت والدتى من المستشفى وبعدها بأسبوع  
خرج ممدوح لمتابعة العلاج فى المنزل ذهبنا للمأذون و  
ذهبت معه الى المنزل،

والدته تحضر شنتطها للسفر، دخلت لها غرفتها وقفلت  
الباب علينا

- ماتمشيش يا ماما خليكى معانا.. ممدوح محتجلك  
زى ما محتجلى.. ممدوح محتاج يشوفنا جمبه واحنا  
مبسوطين وكويسين.

والدته قبلت رأسى واخذتنى فى حضنها :

- أنا خايضه أكون بضيقك يا بنتى فى بيتك  
سامحينى.

- ياماما مضيش بنت بتكره أم جوزها، أم الراجل اللى  
حببته وسابت نفسها فى حضنه، بس للاسف الأم هى  
اللى بتكون حاظه فى دماغها أن مرات أبنا دي واحده  
جايه تأخذ أبنا منها والتصرفات هى اللى بتشيل  
النفوس من بعض مش أكثر.

- وأنا عرفت غلطتى يا بنتى وكنت غبيه لما حظيت  
نفسى فى مقارنه معاكى حبى ليكى أكيد غير حبه  
ليا.. وكان لازم أكون فرحانه لما أشوفكم بتحبه  
بعض ومبسوطين مش العكس.

- طب سيبى بقا هدومك مكانها ويلا عشان نتغدى سوا.

وبعد الغداء قال لى ممدوح:

- أدخلى ألبسى يا منه أنا مخنوق وعاوز أنزل اتمشى معاكى..وحشتنى شكل الشوارع وأنا أيدي فأيدك.
- مرت الايام وكانت حاله ممدوح تزداد سوء وحالته الصحيه تدهور أكثر، كنا نذهب الى المكتب معا، كان دائما يشعجنى على النجاح، فكان لايتركنى لحظه واحده. ذهبنا الى كل مكان كانت لنا بيه ذكرى جميله كأنه يلقى نظرات الوداع على هذه الأماكن نظر فى عيني نظره لن أنساها
- حبيبي ..أنت بتبصلى جامد كدا ليه؟!
- سببى أتوه فى البراح اللى فى عنيكى.. بحب أشوف صورتى فى نن عنيكى..
- كلامك حلو أوى..
- أنتى اللى عنيكى حلوه أوى تخلى الحجر يتكلم.
- أنا بجد مش عارفه الأيام اللى فاتت دى كنت عايشه فى الدنيا أزاى من غيرك..سبحان من صبرنى على فراقك.
- أنا بقا الأيام اللى فاتت دى مكنتش عايش أصلا.. كنت ميت على وش الدنيا من غيرك.
- بعيد الشر يا حبيبي..أنا مش هسيبك تانى.

- نفسى لما أموت تبقى ملامحك آخر حاجه شافتها عيني، وحنك آخر مكان أسكنه فى الدنيا.
- متقولش الكلام دا كلامك دا بيوجع قلبى..
- طب أحضننى جامد وغمضى عنىكى عاوزك تتخلى اللى أنا شايفه دلوقتى

ردت بدموع عيني :

- شايف أيه !؟
- شايفك....
- شايفنى أنا؟ من أنا قاعده جنبك أهو..
- لا شايفك لابسه فستان أبيض وحاسس نفس أحساس يوم فرحنا.. والملايكة بيزفونى لببت جميل أجمل من دا..

رددت والدموع تتساقط من عيني تأكدت أنه سيفارق الحياه

- طب وأنا هتسبنى لمين مش هنتزف سوا خدنى معاك متسبنيش..
- هستناكى هناك....

مات ممدوح وماتت معه فرحتى وضحكتى، اکتأبت أیاما لا  
أخرج من غرفتي ولا أريد رؤیه أحد أطلاقا. في يوم  
جاءني ممدوح في المنام

وكان غاضبا منى، فتذکرت كلامه لى وتشجیعه لى على  
تحقیق أحلامى

فأستيقظت صباحا و ذهبت الى مكتبى ومرت الأيام الى أن  
أصبح المكتب الصغير أكبر شركة للديكورات فى البلد  
وأشتریت فيلا عملت فيها معرضى، عمر أتى الى مصر  
وأصل بى لمعرفه أخبارى دعوته لحضور معرضى وأتى،  
نجح معرضى وحققت شهره فى مجالى خصصت مكان فى  
الفیلا لتعليم الاطفال الموهوبين الرسم مجانا كنت لا  
أشعر بسعادتى ألا وأنا جالسه وسط الأطفال. فى يوم  
جاءنى عمر الفیلا وعرض عليه الزواج منه :

- منه أنا بحبك وبتمنى تكونى شریكى حیاتى.
- عمر أنت انسان كویس وأى بنت تتمناك بس أنا مبفكرش  
فى الجواز نهائى.
- أنتى لسه صغيره وجميله..أزای تنهى حیاتك

بالشكل دا !!

- أنا عايشه حياتى كلها على ذكرى ممدوح وبس وعايشه  
مستنيه اليوم اللى هنتقابل أنا وهو فيه.

بعد انتهاء المعرض ذهبت لزياره ممدوح وأنا حامله له بوكيه  
ورد وأبكى

- كان نفسى تكون معايا... تشوف نجاحى اللى انت السبب  
فيه..

بجد شكرا على كل حاجه.....

**السيرة الذاتية :****مروة المصري / مؤلفة و قاصة مصرية****الدراسة / ليسانس الحقوق**

بدأت موهبتها منذ نعومة أظفارها ، اشتركت في العديد من المسابقات ، و فازت بالعديد من شهادات التقدير و الجوائز العينية ، و لها العديد من القصص و الروايات في الجرائد الورقية و الالكترونية ، و قد شجعها هذا على طباعة مجموعتها القصصية كومبارس ، و التحضير لطباعة عدة روايات أخرى .

الصفحة	العنوان	م
٥	الاهداء	١
٦	المقدمة	٢
٩	كومبارس	
٦٣	صفحة الخذلان	٣
١٣٧	السيرة الذاتية للمؤلفة	٤
		٥